

**ASO LUA, 21 IUNI 2022**

*Na tauaofia le Fono Aoaofa Faitulafono i le itula e 9:29 i le taeao e tusa ai ma Polokalame o Fonotaga a le Palemene 2021/2022.*

Tatalo.

**FOFOGA FETALAI:** Ou te faasilasila atu ua amatalia nei Taulumaga a le Fono Aoaofa Faitulafono.

**TUSI FAAMAONIA O LE FILIFILIA**

E tusa ai ma aiaiga o le Fuaiupu 84(2) o le Tulafono o Faiga Palota 2019, **O Au, TUIMALEALIIFANO VAALETOA SUALAUVI II**, O Le Ao o le Malo, ua tuuina atu nei le Tusi Faamaonia o le Filifilia o le sui usufono ua tau le suafa iinei e avea ma Sui Usufono o le Palemene o le Malo Tutoatasi o Samoa e amata mai le aso leni:

FOISALA Lilo Tuu Ioane

**TUUNA ATU** i lou nei Lima i Vailele i leni aso 04 o Iuni 2022.

**Sainia: Tuimalealiifano Vaaletoa Sualauvi II**  
**O LE AO O LE MALO**

**FAATAUTOINA O LE SUI USUFONO MO LE ITUMALO  
PALOTA O GAGAIFOMAU GA NU.2**

**FOFOGA FETALAI:** A o le i afio mai le sui usufono i luma o le Laulau mo le faatinoina o lau Tautoga, ou te valaau atu ina ia e tulai a o o'u faitauina le Tulafono Laitiiti o Amio Taualoa Faa-Palemene.

*Na tutulai le sui usufono o le Palemene a o faitauina e le Fofoga Fetalai Tulafono Laitiiti o Amio Taualoa Faa-Palemene.*

**Tulafono Laitiiti o Amio Taualoa Faa-Palemene:**

**FAAMATALAGA O FAAMOEMOEGA:**

O le matafaioi patino a Sui Usufono uma o le Palemene o le tausisia lea o tulaga aupito i sili ona maualuga o uiga taualoa, e puipuia ma faatumauina ai le mamalu o le Palemene ma faia ai taumafaiga uma e faatumauina ai aiaiga autu o le Faavae. O aiaiga autu ua taua ua faamoemoe e tuuina ai ni taiala ma ni tulaga i Sui Usufono taitasi o le Palemene, e tatau ona faatino ai o latou tiute ma matafaioi i se tulaga toatasi po o i le aotelega.

**O AIAIGA AUTU:**

(1) Faamaoni i le atunuu ma ona tagata:

O sui usufono uma e tatau ona tausisia mataupu o le Tautoga o le Loto Faamaoni i taimi uma ma tausia le mamalu ma le aloaia o le Malo Tutoatasi o Samoa; ana faalapotopotoga ma ona tagata.

(2) Faaaloalo i Tulafono:

E tatau i sui usufono uma ona tausisia Tulafono a Samoa ma puipuia aiaiga autu o lo o i totonu o le Faavae.

(3) Faaaloalo i Tagata uma:

E tatau i sui usufono uma ona faaaloalo i isi sui usufono, tagata lautele ma ofisa maufofi o le Malo faapea foi ma le galue i tulaga mamalu, faamaoni, o le le faaituau; aemaise le faia o le amiotonu i taimi uma.

(4) Faatinoga Lelei o Pule:

E tatau i sui usufono uma ona:

(a) faatulaga a latou mataupu totino;

(b) faaaoga so o se faamatalaga ma faamatalaga uma na maua mai i o latou tofi faale-Malo; ma

(c) faatinoina o so o se malosi po o pule na maua mai i o latou Tofi faale-Malo, mo na o le lelei o tagata lautele, ma pe a fai e tulai mai o so o se tulaga talafeagai ma se tulaga moni e feteenai ai aia, pe i tulaga tau tupe a le sui usufono lava ia, tupe faaletulafono po o se aia a le sui usufono e tatau ona manaomia e faasilasilaina atu ma le faia o so o se laasaga e aveese ai sea feteenaiga po o le le auai atu i lena feutagaiga tau pisinisi.

Manaoga Faapitoa mo Minisita ma Isi Tagata o lo o Umia Tofi faale-Malo:

O sui usufono uma o lo o umia tofi Faa-Palemene o so o se ituaiga ua manaomia e usitaia atoatoa aiaiga autu e pei ona faamatalaina i luga ma e le tatau, i lalo o so o se tulaga ona faia o so o se faaiuga po o le tuuina atu o se malosi o so o se ituaiga, po o le a lava, e tusa ai i se mataupu o le a maua ai e sui usufono so o se faaopoopoga i ana meatotino po o se faamanuiaga.

FAASALAGA:

O le solia o lenei Tulafono Laitiiti o le a ono tagofia e le Komiti o Tulaga Aloaia ma Amio Tualoa po o e pei ona o le a fuafuaina e le Palemene.

### **TAUTOGA O LE LOTO FAAMAONI**

**FOFOGA FETALAI:** Mo le faatinoina o le Tautoga ou te valaau atu i le sui usufono ina ia e afio mai i le Laulau mo le faatinoina o lau Tautoga. Afio mai.

Ia faitau lau Tautoga ma ta'u lou Suafa.

“O A’U O..... ou te tauto i le Atua e ona le malosi uma lava o le a ou faamaoni ma tauaveina tonu le lotonuu faamaoni i le Malo Tutoatasi o Samoa, ma o le a ou faataunuuina ma le tatau ai ma le faamaoni ou tiute e avea ai o se Sui Usufono o le Palemene o Samoa. Ia fesoasoani mai le Atua ia te Au.

**FOFOGA FETALAI:** Ia, e tuuina atu le Tusi Paia lena e te faitau ai mai le Kenese seia oo i le Faaaliga i lenei Nofoaiga.

*Na faaaliga le agaga fiafia o le Maota i le patipati o latou aao i le maea ai o le faatautoina o le sui usufono fou.*

**FOFOGA FETALAI:** I le tulaga aloaia, ou te faatalofa atu ai i le paia o le Palemene i lenei taeao fou, i le afio o lau Afioga i le Sui Palemia, le afifio o a outou Afioga i Minisita o le Kapeneta, e faapea foi Afioga i Minisita Lagolago.

Ia e faapea foi lea Itu o le Maota i le afio o lau Afioga i le Sui Taitai faapea le mamalu o sui usufono uma o le tatou Palemene. Faafetai i le alofa o le Atua ua mafai ona momoli mai lo outou soifua i lenei taeao mo le faaauauina o le tatou galuega.

E faapitoa se faatalofa i le Afioga i le sui usufono mo Gagaifomauga Nu.2 e pei ona faatinoina nei lana Tautoga i lenei taeao. O lea ua atoa Nofoa o le Fonousu a le atunuu ina ua iu manuia le faamoemoe o le itumalo. Faamalo le onosai ma le faatoatoa. O le tatalo a lau Palemene, tau ina ia alofa le Atua ma faaaupegaina mai le lagi le tofa aua le tauaveina o le Nofoa o le itumalo ae faapea foi lo tatou valaauina. Ia faamanuia le Atua i le tulai mai o lau Afioga i le sui usufono mamalu.

E faatalofa atu foi i le paia o aiga ma le itumalo ua mafai ona auai mai e molimauina le faatautoga o la outou sui usufono filifilia, matou te faatalofa atu i le tulaga aloaia.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a lo tatou Malo, malo le soifua manuia ma le lagi e mama i lenei taeao.

Samoa i ou tulaga faalupelupeina i lau faafogafoga tapuai mai, e talitonu lava le taofi o lo o tumau pea le agalelei o le Atua i si o tatou atunuu. E faatalofa atu lau Palemene i lenei taeao. Ia manuia tele le usugafono a le tatou Maota i lenei aso, ia manuia foi le tapuai mai a si o tatou atunuu.

## **ISI FAASILASILAGA A LE FOFOGA FETALAI**

**FOFOGA FETALAI:** Mo le silafia e le mamalu o le Palemene, o le Aso Lua, 24 o Me 2022 na ou faailoa atu ai le Faitioga Tusingusia a se tasi o sui usufono mamalu e faatatau i le lagaina o se mataupu tau Tulaga Aloaia e tusa ai ma Tulafono Tumau 178(1). O lenei mataupu e tauala mai i le sui usufono mo le Itumalo Palota o Gagaifomauga Nu.1, Hon Faimalotoa Kika Stowers Ah Kau e faasaga i le sui usufono mo le Itumalo Palota o Gagaifomauga Nu.3, o le Afioga foi lea i le Minisita o Faatoaga ma Faiga Faiva, Honourable Laauli Leuatea Polataivao Fosi.

O le Aso Lua 31 o Me 2022 na ou taulimaina ai le Tali Tusingusia a le sui usufono mamalu o lo o faasaga i ai le Faitioga mo le iloiloga a le Fofoga Fetalai mo sana faaiuga i lenei lava mataupu.

I le usitaia o aiaiga o Tulafono Tumau 178(2), na iloilo e le Fofoga Fetalai le tulaga o lenei mataupu mo sana faaiuga, pe ua fesiligia ai Tulaga Aloaia o le Palemene. O lea ou te lipoti atu ai lenei mataupu i le Fono Aoa e faapea; i le maea iloiloina o lenei mataupu, ua taunuu atu ai se faaiuga e faapea; e le o se mataupu e taunuu atu i se taunuuga e faapea ua solia ai Tulaga Aloaia o le Palemene. O se mataupu foi e le oo atu ona aafiaga i se laasaga e ono tagofia ai e le Komiti o Tulaga Aloaia ma Amio Tauloa e tusa o aiaiga o Tulafono Tumau. Peitai, o le a tuuina atu i le sui usufono mamalu se lapataiga ma se fautuaga tusingusia a le Fofoga Fetalai e faamanino ma faatonufofola ai lenei mataupu mo le agai atu i le lumanai, ma ua faamuta foi iinei lea mataupu.

## **TUUIINA ATU O LIPOTI A KOMITI FAA-PALEMENE**

*Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).*

1. P.P.2022/2023 Nu.24, Lipoti a le Komiti o Tupe Maua ma Tupe Totogi i le P.P.2022/2023 Nu.9, Tala Faatatau o Tupe Faaopoopo (Nu.2) 2021/2022.
2. P.P.2022/2023 Nu.25, Lipoti a le Komiti o Tupe Maua ma Tupe Totogi i le P.P.2022/2023 Nu.8, Tala Faatatau Autu o Tupe 2022/2023.

Ma le faaaloalo lau Afioga.

### **TULAFONO TAU FAAOFI O LE FAATATAUINA O TUPE FAAOPOPO (NU.2) 2021/2022 & TULAFONO TAU FAAOFI O LE FAATATAUINA O TUPE 2022/2023 – felafolafoaiga i luga o le faitauga faalua**

**FOFOGA FETALAI:** E tusa ai ma Tulafono Tumau 133, o le a faaauau felafolafoaiga i Tulafono Tau Faaofi e lua e pei ona ou valaauina, ma e tatau ona agai sao lava saunoaga a sui usufono i Tulaga tau Tupe ma le Tamaoiga o Samoa faapea Faiga Faavae tau Tupe a le Malo.

Ou te faamanatu atu foi i sui usufono mamalu, e le tautalagia i le taimi nei Meataitasi o Tulafono Tau Faaofi. E faatoa saunoa i Meataitasi o le Tulafono Tau Faaofi i le taimi o Iloiloga Auiliili pe a maea felafolafoaiga i luga o le faitauga faalua.

Ia, o lo o i ai se faamanatu a le Nofoa, a o tatou sauni atu mo a tatou felafolafoaiga mo le tatou Tala o le Tupe. Ua i ai se manatu o le Nofoa e ao pea ona faamanatu atu pea le tatou Tulafono Tumau 82 e uiga i tatou faauilavea. Ia, ou te iloa o lena e tofua uma lava a outou Afioga ma tatou Tulafono Tumau, silasila i le tatou Tulafono Tumau 82, o lo o manino lava o le (1), (2), (3). O lo o manino lava le auala e faai mai ai tatou faauilavea, ia faai mai pea i le Nofoa. A talia e le Nofoa, ona faatoa tuu atu lea o se avanoa. A o mea o lo o faamamafa mai i le (1), na o mea o se mea e fia faasao, point of order, po o se mea e fia faamalamalama, point of clarification, po o le sailia o se faamalamalama, seek clarification. O lona uiga, ia, e malamalama gofie lava le uiga o le tatou Tulafono Tumau. Ua manatu foi le Nofoa, ia, o le a tatou taasisia pea ia tulaga, ona o le manumanu lava i taimi o sui usufono mamalu o lo o fia faafogafoga mai foi o latou itumalo ae faauilavea ona ave lea ma mea o le a motusia ai se saunoaga ua uma ona tapena, aemaise foi o lea e silafia lelei e le Maota, o lou faauilavea

i se tasi o sui usufono, o le faaumaina foi lena o lona taimi, leaga o faauilavea e i totonu uma lava o le taimi faatapulaaina o lauga.

O le mea lea, o se fautuaga lea a le Nofoa e avatu ma le agaga faaaloalo, ia tatou galulue faatasi, e faigofie ai foi le tatou galuega mo le agai atu i le tatou Tala o le Tupe. E manaomia foi le fia faafogafoga mai o tatou itumalo i siufofoga o latou sui usufono mamalu, ua leva foi ona tapena a latou lauga mo lenei faamoemoe.

Ia, o se fautuaga lea ma le agaga faaaloalo, e talitonu lava ua lava lo outou silafia ma ua taoto tonu foi lea tulaga o tatou Tulafono Tumau e manuia ma filemu ai le tatou Maota.

Ia, o le avanoa lenei mo se sui usufono muamua e fia saunoa. Ia, se i tulai mai lau Afioga i le Sui Palemia.

**Afioga Hon TUALA TEVAGA IOSEFO PONIFASIO (Sui Palemia):**  
Faafetai i lau Afioga i le Fofoga Fetalai. Ma ou te faatalofa atu i lau Afioga i le Fofoga Fetalai ma ou uluai faatulou i le Maota, o lea ua sasao le paia maualuga o le Palemene ma sui usufono uma o le Maota nei. E fia faatalofa atu foi i le tapuaiga a Lana Afioga Mamalu i Le Ao o le Malo ma lau Masiofo, le Afioga i le Sui Tofia ma lou Faletua. Afifio foi Afioga i Alii ma Tamaitai Minisita, Afioga i Minisita Lagolago, ia faapea foi lena Itu.

E faatalofa atu i lau Afioga i le Sui Taitai o le Itu Agai, ma sui usufono mamalu uma o le Palemene o Samoa ua mafai ona faatasi mai i lenei taeao. Ia, e ui foi ina toesea le Afioga i le Tamaitai Palemia, le Afioga ia Fiamē Naomi Mataafa Mulinuu le II, ae o lo o momoli mai ona moomooga alofa aua foi le amatalia o le tatou Fonousu i lenei taeao, ma o lo o sologa lelei tulaga uma o lana malaga pei ona i ai. Ia o lo o sologa lelei foi le tatou faamuli, ae tatou talosia ia lana faigamalaga ina ia toe foi mai ma le manuia.

Ne i galo foi ona e fia faatalofa atu i le paia maualuga o le Faamasinoga, i le afio o le afioga i le Faamasino Sili aemaise foi le Vasega o Faamasinoga Maualuga, ae tainane foi le afio o le Afioga i le Peresetene ma le Vasega o Faamasino.

Le tapuaiga mau i susuga i faafeagaiga taulagi o si o tatou atunuu o lo o faapena ona susu ma alaala i nuu ma afioaga, ia ua malo afua taeao ua maua i le alofa ma le agalelei faasoa o le tatou Tama i le lagi. Ia nuunuu atu ia faatini o tausala o outou paia ma o outou faiga aua le tauasua o le ipu o le olataga i afioaga ma Ekalesia eseese o lo o faapea ona outou aumau ai.

Ou te fia faatulou atu foi i le paia Samoa i le paia o Aiga ma latou Tama, o Tama ma o latou Aiga, le mamalu i le usoga a Tumua ma Pule, Itua ma Alataua, Aiga i le Tai ma le Vaa o Fonoti, Fofu ma Aitulagi, Saole ma Saleaamua ma le Launiu na Saelua, Faatui o le Motu, Tama a le Manuatele ma Tootoo o le Faleula.

Ia o ou paia na Samoa mai Saua seia papa Fafa i le Lualoto, ia mapu ane ia i Niafane ma lafo le taula i malolo, aua ua nofofale Satuiamaa pei o le fetalaiga ia Tuamasaga.

E manatu lau Afioga i le Fofoga Fetalai i lenei taeao, o lea ua sauni ma alo atu foi le tatou Palemene aua foi felafolafoaiga pei o mataupu na faatulaga mai e lau Afioga ma le Failautusi. Ia o le a faapea ona i ai se manatu o le a lauliliuina le tofa ma sasaa foi le oa o finagalo faaalua. Ia, e manatu o le a faatasi mai le Agaga Paia i lenei taeao, ia faamalamalama tulaga uma ma faasusulu mai Lona malamalama ma liligi mai le atamai, ia faaaupegaina foi tatou i le auupega silisili o le lototele, o le alofa ma le filemu, o le a mafai ai ona tatou galulue faatasi aua foi le mataupu ua atofaina o le soalaupulega i le aso. Ia, o le tala lea lau Afioga i le Fofoga Fetalai tau lava ina faapai atu i lenei Itu aemaise foi o le afio mai o le paia i le itumalo o Gagaifomauga 2. Ia e faatalofa atu foi i lo outou sui usufono mamalu lea ua faatasi mai, malo le tau.

Ia, o le tala lea lau Afioga, tau ia ina ou faapea atu, ia manuia le Fonousu a Samoa i lenei taeao. Soifua.

**FOFOGA FETALAI:** Malo, faafetai i lau Afioga i le Sui Palemia mo le folasaga foi e tusa ai ma lo tatou faamoemoe i lenei aso. Ua malo faafetai saunoa, o lea foi ua faatino lau saunoaga ma molimoli mai foi alofaga a le Tamaitai Palemia, o lo tatou Taitai o lo o i atunuu mamao, ia malo faafetai. O lea foi ua faafofoga ma le totoa le paia o le Maota, aemaise o le faafofogaaga a le atunuu. Lau Afioga i le Sui Taitai.

**Tofa Hon Lauofo Fonotoe Nuafesili Pierre Lauofo (Anoamaa 2):** Ia faafetai i lau Afioga i le Fofoga Fetalai i lenei taeao, e na ona faanoi atu lava o se matou minute se tasi, e tau ina amata atu ai sa matou tala i lenei foi taeao fou.

Aua o lea ua maea ona e osi le taulaga, tatou ma lau Afio le Atua i lenei taeao e pei ona e fofogaina foi, ua faamalo faafetai. Ua maea foi ona e afea paia o le tapuaiga a le atunuu, e manatu o lea o le a faataalolo e le toe oo i ai sa matou tala. E faapea foi paia maualuluga ma le mapuepue o lenei Maota i lenei taeao, aemaise o le tatou itumalo ua tatou faatasi.

Ua ou tulai atu i se matou upu aua le sui usufono fou ua tulai mai. Ua faamalo le tau, faamalo le tauivi. Ioe, e le faigata le auala e agai mai i totonu o le Maota lenei. A o lea ua e tau le taua ua e manumalo. O ou mama na, ia faamanuia le Atua i lou tofi, ia faamanuia lou tulai mai. Ia maua le upega lauga, maua le tofa ma le faautaga aua le itumalo ma Samoa.

O le matou faamatalaga lea ma le faaaloalo i lenei taeao, manuia le tatou usugafono.

**FOFOGA FETALAI:** Ua malo faafetai i lau Afioga i le Sui Taitai, e talitonu lava o lea ua i lau Afioga ia mamalu o lena itu, aua foi le taitaina o lena Itu o le tatou Maota i le tatou Fonotaga, malo saunoa. Ua faafetai foi i le faalaeiau ma faalototele foi i le sui usufono mamalu, malo faafetai. O le uiga lava lea o le tatou galuega, tatou te galulue faatasi, ina ia manuia si o tatou atunuu. Ia faafetai mo faamanuiaga i le tatou sui usufono. O lea foi ua oo lau faatalofa i le mamalu o le itumalo o Gagaifomauga 2, ia malo faafetai.

Ou te talitonu o lenei taimi, o le a faagasolo loa le tatou galuega. O lea ua matau atu, o lea ua fou mai le sa o le sui usufono o Gagaifomauga 2. Tulai mai le sui usufono mamalu.

## **SAUNOAGA FAA-TAUPOU**

**Afioga FOISALA LILO TUU IOANE (Gagaifomauga 2):** Faafetai i lau Afioga i le Fofoga Fetalai mo le matou avanoa. Ae le i faia se lauga faataupou a lenei itumalo, e muamua ona ou faatalofa ma faafeiloai atu, i le afio o lau Afioga i le Fofoga Fetalai. E faatalofa atu foi i le afio o lau Afioga i le Sui Palemia, o alii ma tamaitai Minisita o le Maota. E faatalofa atu foi i le afifio o a outou Afioga i Sui Minisita. E faatalofa atu foi i le Sui Taitai o le Itu Agai ma lena Itu. E faafeiloai atu foi i Ofisa Sili o Pulega o Matagaluega ma Pisinisi Tumaoti o le tatou Malo o lo o vae ma lima i ai lo tatou Malo. O le faafeiloai lea ma le faatalofa, ae tainane foi o si ou itumalo pele ua aofia potopoto i lenei vaega o le taeao. Ua malo le soifua malo le lagi e mama i lenei vaega o le taeao fou.

Ou te muai ta le Faleta, ma suati le Utauto o le atuao o Malo, aua o lele ua atue le faatamasoaliiiga a tautai o le vasa. Ina ua agi le lai ma le fisaga, ona sou ai lea o le taumuliava. Ae a tuantai lea atuvasa ma lea atuvasa, ona taoto lea o le tai, le tai tafola ma tai lomalomama.

Ua ta piiama i lou sa folau, lau Afioga i le Fofoga Fetalai i le taulaga molia i lenei taeao aua le Atua ma Lona finagalo. E fai mai o le Atua na ape, o le Atua o taitaiasune o le Atua le Tama, o le Alo ma le Agaga Paia.

Ia tulouna le afio a lau Afioga i Le Ao Mamalu o le Malo le Malo Tutoatasi o Samoa ma lau Masiofo, lau Afioga Tuiaana Tuimalealiifano Vaaletoa Sualauvi. Afio lau Afioga i le Sui o le Fono a Sui Tofia ma lou faletua, lau Afioga Le Mamea Ropati Mualia. Tulouna lau afio o lau Afioga i le Faamasino Sili ma lou Ofisa Mamalu o Faamasinoga.

Ou te faatalofa atu foi i lau Afioga i le Tamaitai Palemia, lau Afioga i le Saofaapito, lau Afioga Fiame Naomi Mataafa. O le Sui Palemia ma Minisita o le Kapeneta, i Alii ma Tamaitai faapea Minisita Lagolago. Afio lau Afioga i le Fofoga Fetalai ma le Palemene ma le Fono Aoaofaitulafono a Samoa. E faatalofa atu foi i le Sui Taitai o le Itu Agai ma lena Itu o le Maota. E le faagaloina foi Ofisa Sili o Pulega o Matagaluega ma Faalapotopotoga Tumaoti, o lima ma vae o le tatou Malo.



E le faagaloina foi le tapuaiga a Samoa i Tama ma o latou Aiga, le usuga a Tumua ma Pule Ituau ma Alataua, Aiga i le Tai ma le Vaa o Fonoti.

E faatalofa atu foi i le tala paia o le Talalelei, le afifio o taitai o ekalesia i so o se Fatafaitaulaga i totonu o le atunuu, o lo o nonomanu aua Samoa mo a taeao.

E le faagaloina foi le Faigamalo a Tutuila ma Manua, le afio o lau Afioga i le Alii Kovana ma le Sui Kovana, Fofoga Fetalai o le Maota ma le Faigamalo. O paia lava lea o Fatulegae ma le Malo tumau, o Laloifi ma Falesau, o Gagamoe ma Utumoe. O paia na o le Faleagafulu, tainane le paia o tootoo o le Manuatele. O paia na o Samoa e amata mai i Poumasame seia paia Fili ma Puletuu.

Tulouna ia si ou itumalo pele o Gagaifomauga, aua o ou paia aginunuitetele, ma ou mamalu agilaufofola i Fioga ma Tanugamutia, o paia e amata mai Paia, Samauga ma Lefagaoalii. Le afifio o sao e fa, afifio le nofo Usoalii le aiga Sa Peseta, alalatai le falefa o Samauga. O le paia o le afioga o Matavai, Faletagaloa ma Fatuvalu, susu ai le Tagaloa faapea lo oulua toalua o Sa Oloapu, alalatai foi le toafia o tulafale.

E le faagaloina foi na i ou tama faale-Agaga ma outou faletua i totonu o le itumalo. Ua faafetai tatalo, faamalo mo galuega lelei o lo o filemu ai pea si o tatou itumalo. Ae aumaia le faamanuiaga mo le atalii aua lenei Paeaiga. Ia maua lou malosi aua saofaiga eseese i totonu o lo tatou itumalo.

I le faatausilimea se magauga a le Tagaloa Aopo ma sa i ai le matega pe tua ma ni a le faamoemoe, ae a la le aso? O lea ua tepa i ula, ua tago i ula, ua futifutiamanuula le taeao. Ia tatou faatele laia so tatou sao ia Manuvao, ma sili lapalapaomalo i le Atua o le Foafoaga. Aua o lea ua tatou feiloai i matalaosagamai ae le o le afu o le tai. O lea ua tatou feiloai i magafetau soifua e pei o le upu ia Leutogitupaitea le tamaitai o le Alataua, o le teine o le itulagi lea. Aua o le a se tofa sa sailiili mamao ma se faautaga oooo, ana le a'u le Atua e le tau lau o le faamoemoe lea ua tatou penei ai. Ia viia lea o le Atua e faavavau Lona alofa.

Lau Afioga i le Fofoga Fetalai o le Maota, lau Afioga i le Tamaitai Palemia, afioga i Minisita o le Kapeneta, le Palemene o Samoa faapea lena Itu o le Maota.

Le faafofogaaga tapuai a Samoa mai atunuu i fafo, se malo le toa, faafetai faatoatoa, malo le tau malo foi le folau. O lea ua amata ona see le vaa i ona lagotonu. A o le tatalo a lenei itumalo, faifaimalie le faiva. O outou mama na, ia faatasi le Atua ma outou.

A o le aso, malo afua ailao ua maua, le tapuaiga le leoa a Samoa na lua, ia tui mai laia le mulipapaga ma po le fala ma ula le mulilau, ooloo nofo laia ma matamatanonofu le maota o Tuiaana. Ae nuu lelei ua matagofie lo tatou faamoemoe, o le a tatou faifaima faatasi i lenei Paeaiga. Ae le mafai ona ou laaloa i fau, ae faagalo si ou uso a sui usufono ia Vaele Iona Sekuini. O le sa tu i le too, ae ua auina e le Atua, malo mo le tauasaina o lo ta Nofa mo

lenei Paeaiga. E tele mea lelei sa e tauasaina ae ona ua fai le pule a le Mataisau ma le Foafoga. Ia malo le tau, alu ia e muamua i lo tatou nuu ua uma ona tofi.

O le a faalelepa i aau mamao ma ee i tialologo le seuga a le tuavao, ua ua nofoia Tiu, Tiaseu ma Falemua ma Falevaai ona pau ai lea o Tuauu ma Fuamalu.

A fai foi e paopapa pe le tautamalii i la outou faafofoga i se upu, o le upu e fai i le Tuisamau, a vale malie ma Vaitoelau, aami le too o le savili e teuteu ai lo ta va.

Malo i lau Afioga i le Taitai o le Itu Agai ma lau Vaega Faaupufai, ua malo le galulue. Ua tele foi lo outou sao i le atunuu ma ona upufai ma lona tamaoiga, ia sagai ane laia ai o le tai i galuega fai o lenei tausaga.

Ae ou te le i tuua le mea nei, faafetai tele i si ou itumalo ma si ou nuu o Lefagaoalii. O le 21 o e sa palotaina ma aumai lo latou faatuatuaga ia te au, o se auuana e faatauvaa. Ua faafetai, faafetai tele, i le nofo a faafeagaiga ma latou faletua, o Patele ma Tiakono, o Epikopo ma ualota taitasi, o tagata uma sa o latou lagolagoina au.

Ou te le faia ni folafolaga, ae tuli i luma so tatou ai, o le a tuu atoa i ai lou malosi, ou te tautua ai i lo tatou itumalo. E manaomia lava la outou tuualalo. Ua faamalo foi i nai ou uso sa matou tauva, o le faagatama i le tai e le mua uma ni vaa. Ia tapuai maia laia, se i taumafai atu so ta sao aua le Maota Fono a Samoa.

Ia, o le a seseu i fanua lou sa, ae faamalulu atu e ta foi le pula ma le vaiafei. Afai foi ua siiloa se tala, ia lafo i nuuese. Pe a tuuama le fua ma tatala le filialii, ia aumai le mavaega a Tupu tatou te mavae ai. O manu tatou te tapuai ai, o manu matou te folau ai, o manu foi tatou te toe feiloai ai Samoa, a o le mavaega e tasi i le Tusi Paia, e fai lou nuu ma ou nuu, e fai foi lou Atua ma ou Atua. O le mea e te maliu ai Fiamē ma lau Faigamalo, e oti ai foi lenei itumalo o Gagaifomauga 2.

Lau Afioga i le Fofoga Fetalai, ona ou oo mai lea i le Tala o le Tupe e pei ona folasia i lumamea. E faamalulu atu ua tautuauega le sa o lenei itumalo, ae matou te manatu e le tagisa le itumalo lenei. Ma o lena ua uma ona taoto atu i lumamea, lau Afioga i le Fofoga Fetalai, le talosaga sa auina atu e le Afioga ia Vaele, e pei ona i ai matou auala ma paipa ma isi mea. E pei lava ona fai atu se tala, e le tagisa lenei itumalo, a o le Tala o le Tupe ua taatia i lumamea, e matua lagolagoina e lenei itumalo o Gagaifomauga 2. Ma lou faaaloalo lava, faafetai.

*Na faaalua le agaga fiafia o le Maota i le patipati o latou aao, i le maea ai o le Saunoaga Faa-Taupou a le sui usufono mo Gagaifomauga 2.*

**FOFOGA FETALAI:** Ua malo faafetai le saunoa, malo foi le malele faafetai foi mo le tofa faaalua. O lea ua faafofoga ma le totoa le paia o le

Maota, aemaise foi o le faafofogaaga a Samoa, ae a si ou itumalo o lea e tapuai mai, ua malo saunoa, faafetai foi lauga. O le uiga lea o tatou tofiga, o le tatou valaauina lea o le faaleo aua le mamalu o le tatou itumalo. Ua leai lava se tulimanu e le i oo i ai lau saunoaga aemaise foi o lau lauga faataupou, o lea ua faafofoga Samoa, e le gata o Samoa i Sisifo nei ae faapea foi i le tatou uso i Sasae, o le mea lea malo faafetai. Faafetai mo le lauga faafetai foi tapena, ou te talitonu ua leva lava ona e tapena i nei mea, ua e oo mai, o lea lava ua e lauga mua i le tatou fonotaga lenei, o se tasi o fono taua, malo faafetai. E faafetai e le o faagaloina lava si ou uso e pei ona valaau i ai le Atua, malo faafetai. O lea foi ua taatia i paga le talosaga a le itumalo, o le faaauauina o le talosaga sa faatino e lou uso ua tuua i tatou nei, ia malo faafetai. Faafetai mo galuega faaauau, ia faapena ona fesoasoani le Atua ma faamanuia i lau Afioga i le sui usufono, aemaise o le tapuaiga a lo tatou itumalo, faafetai mo le tapuaiga.

E matau atu o lea ua fou mai le sa o se tasi o sui usufono tamaitai mai Aleipata Itupa i Lalo, o lou avanoa lenei.

### **SAUNOAGA FAA-TAUPOU**

**Afioga FAAGASEALII SAPOA FEAGIAI (Sui Usufono Faaopopo – Aleipata Itupa i Lalo):** Ua malo i lau Afioga i le Fofoga Fetalai mo le avanoa. Ou te muai faatalofa atu i le paia ma le mamalu o le Palemene. I le afio o lau afioga i le Sui Palemia, Minisita, Sui Minisita aemaise le mamalu o le Kapeneta ma le Palemene nei. E faatalofa atu foi i Ofisa Sili o Pulega o Matagaluega taitasi, le susu o le Susuga i le Loia Sili, le Failautusi o le Fono Aoao Faitulafono ma le ofisa mamalu, ma i latou uma ua aofaga potopoto i lenei taeao. A o lou itumalo o Aleipata Itupa i Lalo, ia tapuai maia, ae se i taumafai atu la outou auaua, e momoli so tatou leo i totonu o le Fono a le Palemene i lenei taeao.

E manatu lava e tupau le laaga o iuomanu, aua ua maale tua o vaivao e pei o upu i fanuasa na malie ai le tau. Ou te faamuoina ai aua le Atua na ia fuaola ma tapuaaoina le soifua o Samoa aoao. Na Ia fofola foi upu i le amataga, “o Au o Le ola o lo o ola lava.” O le Atua lena o lo o faavae ai lo tatou atunuu, o Samoa o lo ta tofi e mamae i le agaga.

O lele ua lalaga le toi o Titialii na tapuivai e pei o le fetalaiga i le loto na manu ai malo o le atunuu. Ua utusasagi le ulafa i seeti, ma lupe na sisila i Mutiatele. Ua falatuugasimotu le vaa o le alo o Tuiatua, aua ua mavae lagi o ao, e faigata le fanua o le la, tulou tulou lava. O Samoa ua aoao, o le nuu ua poto, le paia ia Tumua ma Pule, Aiga i le Tai ma le Vaa o Fonoti, o Tama ma Aiga, o Aiga foi ma latou tama. Tulou le paia o sui vaaia o le Atua o lo o utusesema aua so tatou manuia. E le faagalo Sua ma le Vaifanua Saole ma Saleaamua ma le Launiu Saelua.

E faatulou foi i le motusa, le paia i Faatui ma Tootoo ma upu i le Manuatele. Tulou le Afio o lau Afioga i Le Ao mamalu o le Malo o Samoa, ma lau Masiofo.

Ona ou manatu lea, o lele ua maea ona papae, siliaga tuuloloto ma le i paia o le Faigamalo, i le afio o lau Afioga i le Tamaitai Palemia, lau Afioga i le Sui Palemia ma le mamalu o le Kapeneta, afifio Minisita, Sui Minisita, Ofisa Sili o Pulega o Matagaluega taitasi. Ou te fia faatulou foi i le Afioga i le Faamasino Sili faapea tafamamalu o le Faamasinoga.

Lau Afioga i le Fofoga Fetalai, malo le tofa, o le ala i le faasoaga, a fili le Maota Fono o Samoa, ia faalia e le Agaga o le Atua lau tofa ma ia lua filifili faatasi ma le Atua. Sa talitali lava ma le filemu se faaifoifoga anoa o le Tulafono o le 10%. A lele ua aveave manino ona iu, e viia ai le Atua i lana pule faasoa, ua laolao ai so ta faatauva e fai ma sui o Tina ma Tamaitai i totonu o le Palemene o Samoa. O Atua le nuu, ae le o lilo ia Samoa, o ou eelele na tanu ai laau ma le loto na sila ai le ava i Namua, ae gasealii lona faga vaeane le mavaega na i le Tulatala.

Ona ou afe ane lea i lou itumalo pele o Aleipata Itupa i Lalo, lau Afioga i le Tuiatua Faanofonofu, le paia ia Alalamalae, alii o le itu ma le tane o le itu, Pule na taitai, Lalovi ma le Laulala ma le mamalu ia Saleaamua. E mai mauga tetele seia oo i alo ma fanau. Ua iloga fetu o folauga, ua taoto foi mamalu o matafanua ma siufanua, faamalo le tofupule. E ui ina faigata upu o atua, ae fotu manu e ala i lau palota.

Le paia i alalafaga o ositaulaga, mai Satitoa seia paia Tiavea, faafetai le nomanu mo lo ta itumalo. E avea foi lenei avanoa ou te momoli atu ai le faafetai i si o matou faletolu, o Mutiatele, Lotopue ma Malaela.

E faapea foi ou aiga, o uo ma e masani i le moni o lo outou alofa. E ui lava, peitai o lea ua faatai so ta ai, i upufai o lo tatou atunuu. Lolou ane le saotele ma amiami le atuao i lau tapuaiga mau. Ou te fia ta foi le iuofe ma ou lalagi le sau momoo e faaleo ai la ta faafetai, faafetai tele i le tapuaiga mau a si ou tina matua o Mao Taamilo Feagiai, ua 93 tausaga o lona soifua, ae o lo o ia faia pea le faiva o le anapogi ma le tatalo, aua se manuia o nuu ma le atunuu, malo le tulivae, faafetai le onosai i talosaga, o lau pule lea, ou te alofa mo oe tina.

E le mafai ona ou alu loa, e ao lava ona ou momoli se faamalo ma se faafetai, i le sa ma tauva i le faiga palota ua tuanai atu, lau Afioga Faleomavaega Titimaea Tafua. O upu o le atunuu, e taaalo lava tama a o le uso, a o upu e fai i le itulagi lea, e fetaai lava le tuagane ma lona tuafafine, o laua lava o le aiga e tasi, e pei ona i ai le faamoemoe. Ia maua e i taua le fealofani ma le galulue faatasi aua se manuia o lo ta itumalo.

Lau afioga i le Fofoga Fetalai, e na o ni nai vaega lava ou te fia faaopoopo i nisi o manaoga, e fia faaleleia i totonu o si ou itumalo. E tasi lava le Matagaluega o lo o fia soso atu i ai i lenei itula, lau Afioga i le Minisita o Galuega. Ia atonu e tele nisi manaoga ua uma ona faaleo atu e se tasi o sui

usufono o lenei itumalo, ae ou te toe fia faamanatu atu lava i lau Afioga, e toe 3 lava auala galue i totonu o si ou itumalo. O le suavai i nai aiga i uta e le i oo i ai le suavai. E pei ona silafia le auala sima i Tiavea uta, na tupu ai foi le faalavelave i le Aso Toonai, ona o le auala lea e alu atu, e i ai le tofe se i tulou, ae oso i le isi pito le auala sima, ona ua leai se faailoilo. E le masani ai foi tagata faatoa o atu agai i tua. O lea e toe tuu atu ai i ou tafatafa se i e silasila ane i ai. Ia ma lou manaoga lenei e tasi lau Afioga i le Minisita, ou te talitonu o oe o se Minisita alofa, o oe e te tali manao foi, ona o le malaevaalele o si ou itumalo. E ui lava, ae na ona faataatia atu i ou autafa, fai mai le sulatoga a nai loomatutua, e ua ta moemoe ou tei ane, po o sa ta miti ea, ae moni ua e miti, ua e miti ia toe fausia le malaevaalele o Tiavea, faamolemole lo matou itumalo. Ona o le tatou silasila mamao, i mala faale-natura e pei foi ona aafia ai le malaevaalele i Faleolo i le tausaga ua tuanai, ia o le ala lea, atonu ua tupu le mala faale-natura ma aafia le malaevaalele i Faleolo, ae o lo o i ai se isi malaevaalele e taunuu mai ai ni fesoasoani mai atunuu mamao. O se faamanuiaga foi lea, e tele itumalo o le a faamanuiaina, e pei o Lepa, Lotofaga, Falealii, Fagaloa ma Anoamaa, o le a latalata atu ai i i. E pei ona silafia o lea ua siitia le tau o le penisini o le a le gafatia le sau mai tua. O lona uiga e \$500 e utu ai le taavale i le alu i Faleolo ma le toe foi atu. E na o se vaega lea e fia tuu atu i ou tafatafa, atonu e te talimanao tele, aemaise lava mea nei o tina ma tamaitai, e te alofa tele ma e fai tuafafine.

Ia, lau Afioga i le Fofoga Fetalai, ua taoto le lauaupega, tulou le paia o le Faigamalo i le Afioga i le Tamaitai Palemia, ia o manu na, ia faaaupegaina pea lau tofa mai le lagi. Le afifio o Minisita ma Sui Minisita, ia malualii o outou faiva aua se manuia o Samoa mo a taeao. Ia alofagia foi e le Atua le Taitai ma lenei Vaega Faaupufai, ia maua pea manatu ma finagalo mai le Atua e fautua ai ma agaia le Malo.

Ia, e faaiu sau tala, lau Afioga i le Fofoga Fetalai, ia o lau pule lea, o oe o le pule, o oe o le vaatele, o le auga o faatofalaiga. Ia faaaupegaina mai le Atua ou faiva, ia taualii lou gafa aua le Maota Fono o Samoa. I le ma lenei, e le faailoga tagata le Atua. Soifua le faafogafoga mai a Samoa, manuteleina le Maota, soifua ma ia manuia.

*Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono tamaitai mo Aleipata Itupa i Lalo.*

**FOFOGA FETALAI:** Malo faafetai saunoa i lau Afioga i le sui usufono mamalu, o se tasi foi o sui usufono tamaitai o le tatou Maota, ae faasinotonu i Aleipata Itupa i Lalo. Ia, e le mafai ona aveesea outou mamalu ma outou paia, leaga o lea ua outou nofoia Nofoa o le Maota, e le mafai foi ona aveesea outou paia ma mamalu a o lo o faafogafoga foi le itumalo. O le mea lea, faafetai le tofa, malo saunoa. E ese foi le manaia o le saunoaga a le sui

usufono mamalu, e malamalama lava lou finagalo i mea o lo o manaomia ma momoli mai i se auala filemu ma se auala faigofie, ma e ofi gofie foi i le Faigamalo ituaiga auala faapea. O le mea lea, malo le tofa, ma e leaga o lau saunoaga muamua foi lea i totonu o le Maota. Ia o lea ua faafogafoga ma le totoa le paia o le Maota, ia e faapea foi le paia o le itumalo ma le atunuu. Malo faafetai. E taua tele le tulaga lea o lo oulua galulue faatasi ma se tasi o sui usufono o lo outou itumalo aua lava le agai i luma o le itumalo.

O le mea lea, malo faafetai le tofa, faafetai foi mo lou finagalo faaalua aua lava le tatou Maota Fono, ia o se faamalosiua foi i le tatou Faigamalo. Malo faafetai, faamanuia pea le Atua i lau Afioga i le sui usufono mamalu, faapea foi le itumalo.

Ia, o le avanoa lenesi o se tasi o sui usufono. Ia o lea ua matau atu o lea ua sauni mai le tasi foi o sui usufono tamaitai, le Susuga ia Toomata mai Anoomaa Nu.2, lau Afioga i le sui usufono mamalu.

## SAUNOAGA FAA-TAUPOU

**Afioga TOOMATA NORAH LEOTA (Sui Usufono Faaopopo):** E ia te au le ava ma le faaaloalo lau Afioga i le Fofoga Fetalai ou te tulai atu ai i lenesi taeao e faaleo se lauga muamua a lenesi sui usufono i lenesi Maota mamalu.

Ua pau le tuaau ma fuamalu, aua ua mafua aliiseu, ua ou tu ai nei i le siuaau ma sausau i le moana faatautai o le namo, aua ua oootutu le tai, ne i ou viligia i peau laga ma peau tautala ma lona soa o le auautaa. O upu o le faiva o aigofie, a ola lapalapaomalo o le sa o le aigofie, ona momoli lea o laau i Fogaa. Lea ua maea ona taia le ia lautua ma faataatia i le taumua, aua le viiga o le Atua Silisili Ese o Le ua Faavae ai lo ta Malo ua tu. Le Atua o Le ou le pule ma le malosi uma lava, e a le tu, a le tu lava. Sa tau sola faamaomao le lupe a le tamaitai, pe lele ea ae mau i fea. Sa tau faaifo i le malae o le vevesi, a o le Atua o le filemu, ua tatou lelepa ai nei i le malae o le totoa, e pei o le upu i le malae o fesilafaiga a Tagaloa Lomaloma.

Ou te le faasapi i le maa, ae fia fai malu ou faiva, aua o le manogi o le ola ua puaina i lenesi taeao atofaina. Ua aufasa le la o le alofa tunoa i Tiafau nei, ona o ou uso ma aumeamamae o lenesi ua tatou aleaga faatasi. Ua liligo ai nei le tai o Alo ae noanoa le tai o Tigilau. Ua malie toa ua malo tau ua soo le fau.

Ua ou fia uia le ala o Matautia i le mauga, ou te faatulou atu, tulou tulouna lava. Tulou le paia o le aufaigaluega faauu a le Atua mo upu ma le sakalameta i so o se fatafaitaulaga.

Tulou lau Afioga i Le Ao Mamalu o le Malo Tutoatasi o Samoa ma lau Masiofo, tulouna le Afioga i le Sui o le Fono a Sui Tofia ma lou faletua, tulouna le paia faatafatolu fealoaloai o le Faigamalo, lau Afioga i le Fofoga

Fetalai ma lou Sui Fofoga Fetalai, lau Afioga i le Palemia ma le Sui Palemia ma le mamalu o le Kapeneta.

Lau Afioga i le Sui Taitai o lena Itu, le Itu Agai ma sui usufono mamalu uma o le Palemene. Lau Afioga i le Faamasino Sili, lau Afioga i le Peresetene ma le Sui Peresetene, afifio alii ma tamaitai o Faamasinoga e lua ma le mamalu o le Ofisa o Faamasinoga.

Le paia i Ofisa Sili o Pulega ma Ofisa Sili Lagolago o Matagaluega a le Malo, Pulega ma Faalapotopotoga Tumaoti, o kamupani ma auaunaga eseese.

E faatulou atu foi i Tama ma Aiga, Aiga ma latou Tama, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E faatulou atu foi i le Faigamalo a Tutuila ma Manua, lau Afioga i le Kovana Sili, Lutena Kovana ma sui mamalu uma o Maota e Lua, aua o paia na ia Sua ma le Vaifanua, Fofu ma Itulagi, Saole ma Saleaamua ma le Launiu na Saelua, Tama a le Manuatele, Faatui o le Motu, Laau na Amotasi ma upu i le Faleagafulu.

Ou te faatulou foi i sui o Malo mai fafo o tatou faipaaga. Fata ia i fata sisina ma fata i fataula outou paia talatalagata. O ou paia Samoa, o le sau e le maloia ma le atu e le toe tau seupoposeina aua foi e avea lenei avanoa e faatulou e faatalofa atu ai i le paia o si ou itumalo. Susu Ie e lua, Tagaloa ma Sagapolutele o oulua o Tama a le Malo. Susu le Taofia ma Usoalii, mamalu i le nofo a ituaiga. Afio Aiga ma Matua o Fineitalaga ma le Falefia, susu le Toafa, le Maopu ma upu ia te oe Salelesi.

Afio Sa Taulapapa, alaalatai Niutuiatua ma Leituala e lua. Afio alo o Taulapapa, Seiuli ma Luafalealo, Laufofo ma le Amomua a le Tuiatua, ma le nofo a tulafale. Afio Aiga o Mavaega, Ituala e lua ma le Amomua a le Tuiatua.

Ona ou oo mai lea i si ou nuu pele o Solosolo, si ou nuu na ou fanau ai ma ou ola ae ai. Le afio o Tama Faasisina a le Taofia a Malietoa Taulapapa ma le latou Tama, Tupolesava o le Aloalii, afifio usoalii taua, e na taia le tanoa ia Lufilufi ma Tapaulefano ma e na au i ao. Maliu mai oe Saleutogipoe, o le limamatua o faleupolu o tofiga e fa. Ua le tinio a ua tinipao le uto e pei o le faiva o vai, e pei o le faiva i tapalega. Ua sasa le fala e pei o le faiva i poula ina ua tau le ai e pei o faiva i lapega. Ua fati manino nei auma o matematega aua ua taa i folau ma taipipisi alii ma mapue nei i malo le tai sa loloma. Ou te tu ai nei i Faleseu ae ee i Faletoese ma sausaufialele ai nei le manu na gase i uamanu a ua toe liua mai i le taele o lou fatu, e faaleoina ai lau faafetai tele ma le faamalo i a outou tapuaiga mamana, ma la outou lagolago ma le faamalosiua ma le faamafanafana, o upu alofa ma upu faalototele i taimi e sololelei ma aso o faigata. O aso na taugalemu ai ma aso na le taugalemu ai, ae sa lagona i le loto le pai mai o le mafanafana o la outou tatalo ma le malu o lo outou alofa faale-Atua. O le a ou le seiina ne i lelea

pe ou te paleina ne i avea pe ou te ulaina ne i futia, ae o le a teumalu ma teufatu e manatua pea.

E vivii ae lou loto i le Alii ma olioli lou agaga i le Atua lou Faaola, ina ua silasila mai i lana auauna faafine ua faamaualaloina. O lenei avanoa ua ou maua, e fai ai se tautua a o maua le malosi, aua o lou ola, o le ano e tafia ma le upega e auauese. Ou te tatalo i le Atua i Lona Agaga ou te auauna ai ma fai le faiva o le teuteumalo, aua o lou tiute lea faa-tamaitai o lenei Maota, aua ou te mafaia mea uma ona o Keriso ua faamalosiau mai ia te au. Ou te tatalo foi ina ia tatou femulumuluai i faiva o le tautua a Malo ma le pule, o le filemu a le Atua i o tatou loto. Ae le gata i lea, ia maua e i tatou uma le agaga o le fealolofaai, fetausiai ma le fetalitonuai. Ia tatou faia le amiotonu, ia tatou naunau i le alofa ma ia tatou feoai faatasi ma le Atua ma le loto maualalo, ina ia tatou talitonu ma talia ua filifilia ma valaauina i tatou uma e le Atua mo lenei faiva.

Ou te fiafia lava e avea outou ma au paaga, aemaise ou uso a sui usufono tamaitai uma ina ia tatou galulue faatasi i le loto e tasi ma le faamoemoe ua tasi e maua ai le sini...

**FOFOGA FETALAI:** Ia, ou te vaelupeina le saunoaga a le sui usufono mamalu, e i ai foi le manatu o le a le motusia le saunoaga, ae ua oo i le taimi o le tatou malologa masani. Ia atonu e aoga foi lea taimi e toe fetuutuunai ai le saunoaga ma faamaea mai ai le saunoaga pe a tatou talii mai le tatou malologa.

O le mea lea, malo lauga, faafetai le faaso. O le mea lea o le a faataatia ese a tatou galuega a le Fono Aoa mo lana malologa masani o le taeao.

*Na faataatiaese Taulumaga a le Fono Aoa Faitulafono mo lana malologa masani i le itula e 10:45 i le taeao ma toe faaauau i le itula e 11:26 i le taeao.*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoa Faitulafono.

E i ai le manatu ua maea paleauau le tautega ma le taligasua a le tatou Maota. E talitonu foi ua maua se faasiligamalosi e faaauau ai le tatou galuega. Malo faafetai.

Ia, e faataatiaese a tatou Taulumaga mo malologa o le taeao o lo o saunoa le sui usufono tamaitai mai Anoama Nu.2. O le mea lea, ou te tapa ma le faaaloalo le sui usufono mamalu e tulai mai e faaauau lana saunoaga.

**Afioga TOOMATA NORA LEOTA:** Faafetai lava mo lou avanoa lau Afioga i le Fofoga Fetalai e faaauau ai se faamatalaga. Ou te fiafia e avea



outou uma ma au paaga aemaise ou uso sui usufono tamaitai uma i lenei Paeaiga, ina ia tatou galulue faatasi i le loto e tasi ma le faamoemoe e tasi ina ia maua ai le sini o lo tatou valaauina. O le a lea? Ia manuia Samoa.

Lau Afioga i le Fofoga Fetalai, o le a ou see mai loa i le Tala o le Tupe ua folasia i le Maota i Tiafau nei. E tele ni manaoga o lou sui usufono ae ou te matauina o le utiuti o le faasoaa, o lena ua oo atu i le tele o Minisita ni manaoga, ae o lenei itula, na o ni nai vaega taua lava ou te fia pai i ai. Ou te le tagisa.

Ae i lau Afioga i le Minisita o Eleele ma Atinae Tetele, ua e silafia lava lo matou itumalo i tua, e fai lava si siisii o le tai ma le gagalu o matou gataifale. E manaomia i lenei tausaga pe a tusa ai ma le finagalo le faaleleia o matou taligalu, e sefe ai le tele o eleele o le gataifale o si ou itumalo. E le gata i lea o matou auala galue, o lena ua uma ona e silafia e fia faaleleia.

Lau Afioga i le Minisita o Faatoaga, lau Afioga Laaulialemalietoa, e fia pai atu lava e auala lea i le Matagaluega a lau Afioga, i se fofo faasaieenisi faaonapo nei e auala lea i le SROS e fofoina ai meaituaolo, se i tulou, ma manu faalafua, ua tau fai foi si gase o le aufaifaatoaga i le faatamaia o a latou faatoaga.

Lau Afioga i le Minisita o Tupe, pau lau pai atu i lenei itula e momoli le faafetai. Aisea? Aua o lea ua matauina e lou tagata le \$51 miliona lele ua i ai i totonu o le Tala Faatatau Autu o le Tupe, o lea o le a matou iloa ma ua faapena ona maua se lagona e le toe i ai ni upu ma ni tala, lagolagoina loa e lou nei sui a usufono.

O le tasi foi o le 20% sa faamama ai le tatou eletise ma vai, ma le tele o nisi auaunaga laiti, a o le eletise lava ma le vai i le taimi o le mafatiaga o le Koviti-19 i le utiuti o le faasoaa, sa lagona le agaga faafetai o o matou tagata mai tua. Aisea? E ese le tele o lenei faamama avega. Faamalo faafetai i le Faigamalo.

Lau Afioga i le Tamaitai Minisita e le selu atu, o lea ua matauina le tuuaititia o le totogiina o aitalafu. Faamalo faafetai. E leai nisi manaoga o lou tagata o le a outou silasila mai lava le vasega o Minisita, ou te tuitui i o outou faitotoa pe a manaomia. A o lenei Tala Autu o le Tupe, e lagolagoina e lou nei sui usufono.

Ia, o le a tau faauma lau faamatalaga lau Afioga i le Fofoga Fetalai, ia faamanuia le Atua i le aufaigaluega paia, ia mana pea la outou tatalo, ina ia manuia sui usufono uma o lenei Maota. Ia avea pea outou ma upega utusami e vaimamaina ai olaga o Samoa i le tino, mafaufau ma le agaga.

Faamanuia le Atua i lau Afioga i Le Ao Mamalu o le Malo ma lau Masiofo, lau Afioga i le Sui o le Fono a Sui Tofia ma le faletua. Faamanuia le Atua i lau Afioga i le Fofoga Fetalai ma le Sui Fofoga Fetalai, lau Afioga i le Palemia ma le Sui Palemia, lau Afioga i le Sui Taitai o le Itu Agai ma sui usufono mamalu uma o le Maota, Ofisa Sili o Pulega o Matagaluega, o

itutino uma o tautuaina lo tatou Malo. O paia o Samoa i ona tulaga faalupea ma ona tagatanuu uma, aemaise sui o Malo mai fafo, ia faamanuia le Atua.

I lou itumalo o Anoamaa 2 i lau tapuaiga, tainane aiga, uo ma aumeamamae i Samoa nei ma atunuu i fafo, ae ou maloloina i le alofa ma le agalelei o le Atua. Faafetai.

*Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono tamaitai mo Anoamaa 2.*

**FOFOGA FETALAI:** Ia ua faamalo faafetai saunoa i lau Afioga i le sui usufono mamalu, o se tasi foi o sui usufono tamaitai e fitoitonu i le tatou itumalo o Anoamaa 2, malo foi saunoa, faafetai foi lagolago i talosaga a le itumalo aua lava le agai i luma o le itumalo. Ia o lea foi ua faafofoga ma le totoa le Faigamalo, malo faafetai, a o se lauga mua foi lea a lau Afioga i le sui usufono mamalu i totonu o le Palemene. Malo faafetai. Ua faafogafoga foi ma le totoa le paia o le Maota aemaise le faafofogaaga a le atunuu aemaise foi o lo o faafogafoga mai a si ou itumalo, ua leai lava se tulimanu e le i oo i ai le saunoaga. O le mea lea, malo le lototele, faafetai foi le tapena, malo le sausaunoa i lenei aso.

Ia, o le avanoa lenei o se tasi o sui usufono. Ia o le a vasai ia lea Itu ae o le a tuu atu ia i le alii matua o lea Itu ona toe oo atu ai lea, o lea ua maua atu le...

Ia le sui usufono mamalu o Siumu, Honourable Tuuu Leota.

**Tofa Hon TUUU ANASII LEOTA (Siumu):** Faafetai i lau Afioga i le Fofoga Fetalai mo le avanoa. Ou te manatu foi o lea ua maea le palegaaau aua foi se faamalosito i le paia maualuga i lau Afioga ma le paia maualuga o le Maota nei.

E manatu o lea ua maliolagi le aniva faafuagalua o matagi, aua ua e tupu foi i le mataisau o le tausamaaga, ua tatou momoli foi lapalapaomalo, tatou toto le niu i le tuaoi i le tatou va ma lo tatou Atua i lenei foi taeao matagofie. Ia o lea ou te faatalofa atu ai i lau Afioga i le Fofoga Fetalai o le Maota, afio foi lau Afioga i le Sui Palemia, afifio foi Alii ma Tamaitai Minisita o le Kapeneta, ae tainane foi Afioga i Minisita Lagolago.

Ia, liliu mai i lenei Itu o le Maota, afio o lau Afioga i le Sui Taitai o lea Itu e agaia le Malo, afifio foi le mamalu o sui usufono filifilia uma o le Palemene o Samoa.

Ou te faatalofa atu foi i le tapuaiga i Le Ao Mamalu o le Malo ma le Masiofo, le afio o le Sui o le Fono a Sui Tofia ma lou faletua, le tapuaiga i le Faamasino Sili ma le mamalu i Alii ma Tamaitai o le Faamasinoga. Afifio foi Ofisa Sili o Pulega o Matagaluega ma Faalapotopotoga Tumaoti a le Malo.

Ou te faatalofa atu foi i le tapuaiga mau a Samoa, i le pule mamalu i alii ma faipule, o le paia lava lea i Aiga, Aiga o Tupu, Aiga o Nofo, Aiga o Papa ma Aiga na Tafaifa, ae tainane le Aiga o Sa Levi, o le Aiga na itea malama aua la outou tatalo e faifaipea aua se manuia o Samoa mo a taeao.

Ou te faatalofa atu foi i le tapuaiga a si ou itumalo, o le paia lava lea ia Sa Asomua ma Aiga e Lua, lau Fetalaiga Tuuu ma le Aiga o Sa Tuuu, le Falelua o Tulafale, Fofoga o le Alataua, Utaileuo ma le mamalu i le Faletolu. Tapuai maia ma le manuia ae se i taumafai atu se tatou sao i le Tala o le Tupe ua opea nei i le Maota. O Samoa e leai se matai na te ulumatalauina, ua maea ona tapuia i mavaega, ua tagafa foi i faia, ae ua fata foi i ao o lagi, a o na tulaga uma, ua saposapo laufulu ai le atunuu nei. E manatu foi ua se punapuna a manu fou lo tatou taeao na liugalua aua o lea ua alafai mai i faguga lelei le maualuga o le Maota nei i ona tulaga faalupelupeina. Ae manatu o le a ou faasee ia i muliava ma faafuata i ua sautalatala.

Lau Afioga i le Fofoga Fetalai, e fia faamauina le faamalo ma le faafetai a lenei usugafono i le Afioga i le Tamaitai Minisita o Tupe ma le Matagaluega o Tupe, i le tapenaina o lenei Tala Faatatau Autu o Tupe 2022/2023 e pei ona lauliliuina nei e le Palemene. Faafetai foi i le Afioga i le Taitaifono ma le Komiti o Tupe Maua ma Tupe Totogi, i la latou foi galuega fita i le iloiloina ma auiliiliina o lenei Tala o le Tupe. O le a leai la se faamatalaga tele i lea vaega, ia pau lava o lea e i ai le manatu ua talia e lenei usugafono le Tala Faatatau Autu o Tupe 2022/2023. Ae o le a agai se faamatalaga i le mea e manuia ai le lautele o le atunuu aemaise foi o manaoga o si ou itumalo.

Lau Afioga i le Fofoga Fetalai, ou te fia muai faaleoina fautuaga a lou itumalo na tuuina mai ma faapea mai, “Tuuu, faamolemole ua matou le fia faalogo atu lava i le felautoai mai o le Palemene i ana Fonotaga, ua manaomia e le atunuu ni galuega ma ni atinae mo le manuia lautele o le atunuu, aemaise o le limavaivai ma le le tagolima i lenei vaitaimi. Tuuu, finau faatamalii, faitio faatamalii, fautua faatamalii, fautua, finau, faitio i se manuia lautele o le atunuu i le agai i luma, ae le o le toe solomuli i tua. Aua tatou te toe tusionsilima. Tuuu, sa tatou i ai foi, o a tatou upu na fai, e maua i lalo Malo, saili i lalo Malo, aua le faasiliaupule, o pule uma e mai le Atua. O a tatou upu foi na sa fai, o le la ua see le sa o le Afioga i le Sao Faapito ma le la foi Vaega i le lafala, tatou galulue ia faatasi ma fesoasoani i ai aua se manuia o Samoa atoa. O si ota lima lava e paia ai lota mata. O oe nei, o au taeao, e le o toe mamao foi le isi faiga palota, tatou tapenapena faalelei i ai.” Lau Afioga o fautuaga ia na tuuina mai e lenei itumalo i lo latou sui usufono.

Lau Afioga i le Fofoga Fetalai, ua matua taugata lava le soifuaga i lenei vaitau, ua silafia uma e le Maota. O le tau o le suauu ma le penisini ua toeitiiti lava \$4 i le lita i le taimi nei. E mautinoa lava le sili atu i le \$5 i le isi siitaga o le a sosoo ai nei. O le tau o meafaufale ua faapena foi. O le tagasima sa \$19 i le amataga o le tausaga, o lea ua \$40 i le taimi nei, o lea ua valoia e oo

atu i le \$45 i le vaiaso nei po o le vaiaso fou foi. Ua moni ai le faaupuga foi lea a mafatua le elefane, tulou lava le Maota, ia ua felelei solo ai nai manuiti o le fogaeleele. E a Rusia ma Ukraine e tau, ae mafatia atu ai ma tatou i Samoa nei.

Lau Afioga i le Fofoga Fetalai, e leai lava so tatou malosi e faasagatau ai i nei mea, ae manatu e taua lo tatou faamoemoe pea i mea o lo o mafai ona maua i o tatou lava lima i totonu o si o tatou atunuu. Ua valoia le matua faaletonu o le tamaoaiga i se taimi o lata mai, ua valoia foi se oge tele lava i le lalolagi. O le mea lea ou te faafetaia ai le Afioga i le Minisita o Faatoaga ma Faiga Faiva i ana polokalame faagasolo o le Talomua. Ona o sui lava o si ou itumalo na afifio mai i le Matagaluega ma feiloai ma talosaga e fia auai i polokalame, lea sa faatinoina le Talomua a lenei itumalo i le masina na tea nei. Sa matagofie mea uma, sa matua lagolagoina, aua o mea e manuia ai aiga, manuia ai nuu, manuia ai Ekalesia, aemaise o le manuia o itumalo. O le faamoemoe e tatau ona faaauau pea, ina ne i tulai mai se pefea i le lalolagi, a o lava pea meataumafa i totonu o le tatou atunuu.

Lau Afioga i le Fofoga Fetalai, e le o afio mai le Afioga i le Minisita o Vaalele, ae talitonu o lea e afio mai le Afioga i le Sui Palemia ma le mamalu o le Kapeneta, ae o fautuaga e tuuina atu pea. O le vaalele ua uma ona faia i ai le faaiuga a le Faigamalo ma e le toe manaomia ai nisi faafefinauaiga, pau lava o lea e manaomia lava so tatou vaalele. Ae faafetai o lea sa saunoa manino lava le Afioga i le Minisita o Mea Tau Vaalele, o lo o vaavaai ma sailiili le Faigamalo i se isi vaalele e talafeagai, talafeagai sona tau aemaise o se lisi ina ia faafaigofie ona gafatia e a tatou seleni. O le a tatou tapuaia le faamoemoe o le Afioga i le Minisita ma le Faigamalo i se tatou vaalele. Ae ua ou taua ia vaega ona o le toatele o le atunuu ua faapena ona fia malaga mai i Samoa, ae peitai ua le maua ni avanoa, ua le lava foi vaalele e malaga mai ai, ua faapena ona fesili mai, e tau saili pe le taugofie le lafo mai o seleni i Samoa nei e totogi ai o latou pasese e totogi atu ai i Samoa nei. Ua matua taugata lava le pasese mai Niu Sila lava ia. E i ai lava le manatu o tupe, o pasese, o tagata Samoa e malaga mai ma malaga atu, e tatau lava ona masaa mai i totonu o le atunuu aua le faaleleia o le tatou lava tamaoaiga.

Ua matauina foi le tuuina mai o talosaga mai kamupani vaalele mai fafo i le latou fia faaaogaina o tatou alavaa i le va lea o tatou ma Ausetalia, e faapena foi i femalagaiga le va o Samoa ma Hawaii. Se i silasila totoa ane i ai ina ne i mamulu atu, taunuu mai le tatou vaa e faigata foi ona toe faafoi mai ia alavaa. Ae na o se tuualalo lava ma fautuaga e faatupu manatu i le Faigamalo.

Lau Afioga i le Fofoga Fetalai a o ou i ai pea i mea nei o femalagaiga, ua ou fesiligia ai le tatou faiga faauo ma Niu Sila po o le Treaty of Friendship. O le faia o visa malaga i Niu Sila, aemaise lava o tatou tagata e fia malaga i maliu o aiga i fafo. Ua mautinoa ua ave uma talosaga ma faatinoina mai i Niu Sila. O le taimi muamua a o faapena ona faatino i le Ofisa i Samoa nei,

e 1 lava le aso pe 2 ua maua mai le visa malaga ai, a o le taimi lenei, ua 2 i le 3 vaiaso o faatali. Se paga ua tele le afaina o le mamalu o le atunuu. Ae manatu o se mataupu talafeagai ma le taua lea pe a na faapea o silafia e le Afioga i le Sao Faapito a o i ai i lana faigamalaga i Niu Sila e faatalanoa ai lenei toatuga ua faaalua mai i le mamalu o le atunuu. Ia e eseese lava faigauo, ua pule lava le tama a le olomatua ia. Ae na o se fautuaga ma se tuualalo, ia se i tau silasila ane i ai le Faigamalo.

Lau Afioga i le Fofoga Fetalai ou te fia oo atu lava i le Afioga i le Minisita o Galuega Tetele a le Malo. O le Minisita lea e fia faauo uma i ai sui usufono, aua a finagalo malie lava ma ua faamalieina le Afioga i le Minisita i le talafeagai o galuega e talosaga atu ai, ia, e vave foi ona faatino. Ae a faatino galuega ia lau Afioga i le Fofoga Fetalai, ia e mautinoa lava e faigofie le isi ata palota e sosoo ai, aua e tautala lava galuega lau Afioga i le Fofoga Fetalai.

Ou te momoli atu le faamalo ma lau faafetai i lau Afioga i le Minisita. Faafetai o lea ua maea faatino le alasima lea e i lou itumalo sa ou talosagaina i lau lauga faa-taupou. Faafetai, faafetai le lagolago mai. Ia, e toe 2 lava nai galuega sa ou taua i lea lava lauga, o le auala galue i lo matou pitonuu lea i Saaga ma le auala e agai i le aai e ui atu lava i luma o le Kolisi i Palalaua. Ia o nai galuega na e toe faamanatu atu pea, a o lena e i ina le tofa ma le faautautaga, o le a se aso ma se taimi, o le a matou tapuai atu pea.

Lau Afioga i le Fofoga Fetalai, o lea faatoa manino mai le igoa o le auala lea e agai i lou itumalo i le lauga a le Tamaitai Minisita o Tupe, o le Central Cross Island Road from Tanugamanono to Siumu. O le igoa sao la lea o le auala. Ae ua ou laga lenei auala ona sa ou taua foi i lea lava lauga sa ou tuuina atu ai faafautuaga i le mamalu o le atunuu o lo o faaaogaina ma uia lenei auala, e le o mapu lava le tulai mai o faalavelave tau taavale i luga o lenei auala ma maumau ai le soifua o nisi o le mamalu o le atunuu, talu ai lava le le faautauta i le tauaveina o tatou sa. E faufautua atu pea i le mamalu o le atunuu o faaaogaina lea auala, siaki lelei taofi o lou auala, ma ia faaeteete lava i le soona faasaoasaoa. E fautuaina foi i latou o lo o faafoeina loli lau uta mamafa, o pasi ma kiliva lauolua tetele, e lelei lava le alualu lemu e te saogalemu ai, saogalemu ai foi nisi e ono afaina ai ona o lou faatamala.

Lau Afioga i le Minisita o Galuega, na ona ou faafesili atu lava, po o le a se aso o le a faatinoina ai lenei poloketi? Aua e talitonu ua maea faataoto fuafuaga uma aemaise o vaegatupe mo le faatinoina o lenei auala. Ma lou faaaloalo.

Lau Afioga i le Fofoga Fetalai, ou te fia talanoa puupuu lava i le faamai oti lea po o le Koviti-19. O lo o matauina pea i faasalalauga a Ofisa Faasalalau eseese le faatupulaia pea o i latou ua aafia i lenei faamai i aso taitasi. E lelei ae faailoa mai pea i le atunuu i latou nei e aafia, po o i latou nei ua maea ona faia tui e 3, 2, pe 1 foi, po o i latou foi e le i faia lava se tui.

O le popolega lau Afioga i le Fofoga Fetalai, ia po o faamaoni foi i latou ia e malaga mai fafo ma faanofosea i o latou lava aiga, ne i meane o i latou

ia e taamilo ane ma faasalalau pea le faamai. O le naunautaiga lau Afioga, ia matua soloiesea le faamai mai o tatou laufanua. E fautuaina pea le tatou Komiti o le NEOC ina ia faatauaina pea, ma ia faasala, faasala i latou e le faaaogaina talifofoga i nofoaga faitele.

Lau Afioga o le popolega, o lea foi ua maua atu ua maua mai isi ituaiga variant e lua i Aferika i Saute, o le B4, B5 po o le a ea le tau. A o le popolega lena i lenei faamai ina ne i taamilo umi taamilo umi ae te i ua oso mai ai se isi faamai e sili atu ona faigata. Lau Afioga i le Fofoga Fetalai, na o ni fautuaga faatupu manatu, ae silasila ane i ai lau Afioga i le Minisita ma le tatou Matagaluega o le Soifua Maloloina.

Lau Afioga i le Fofoga Fetalai, ona ou oo mai lea i le Afioga i le Minisita o Tina ma Tamaitai po o le foi o lo o faauluulu i ai le faasoasoina o seleni mo itumalo faa-faipule. Ia o lea o lo o faafogafoga mai lou itumalo, ae momoli atu le faafetai i lau Afioga ua matala ia sega sou finagalo, ma o lea ua faataoto mai seia toe feiloai lenei itumalo seia soalaupule, faataoto i lagatonu le mataupu e pei ona ta feiloai ai. O le a le tonu, o le a faapena ona ta toe feiloai, ae faafetai tele mo le avanoa.

Lau Afioga i le Fofoga Fetalai, ae ou te le i nofo i lalo, ou te fia faaaogaina lenei avanoa, ou te momoli atu ai lau faafetai ma le faamalo i lau Afioga, aemaise foi o le Tamaitai Palemia ma le Faigamalo, i le tofia o lou faatauvaai i le Komiti o Tulaga Aloaia ma Amio Taualoa, ae tainane o le Komiti Suesue a le Palemene, lea na latou suesueina le tulaga faaletonu na aliae mai i le Tulafono o le Teuteuga o le Faavae 2020, o le Tulafono o Fanua ma Suafa 2020. O lou valaauina ma le amanaia o le sui usufono o lenei itumalo, o le faaeaea lea i le paia ia Sa Asomua ma aiga e lua, le fetalaiga ia Tuuu ma le mamalu o lenei itumalo. Ua faafetai le faaeaea, faafetai foi ua i ai se sao o lenei itumalo i nei tuga ogaoga faafeagai ma le Palemene i nei vaiata. E leai lava se manatu e toe lagaia lenei mataupu, peitai ona o nisi tusitusiga ma faasalalaua i uega tafailagi ua tau faatauvaaina ai le galuega a le Komiti suesue faapitoa a le Palemene. E i ai mau e faapea e i ai sui ua saina, e i ai foi sui ua saina le malamalama. O le vailiu lea lau Afioga i le Fofoga Fetalai, ou te fia pai i ai. Ou te le alo lava i se ata o se laau, ou te tautino atu o au le isi sui na ou saina i le lipoti a le komiti. Sa ou saina ma lou malamalama ma le mautinoa. Ina ua fulisia uma le komiti ua faamaonia le tele o le faaletonu ua tulai mai, tulai mai ai le eseese o kopi e fa o lenei Tulafono. O le le saina o se sui o le komiti, o lana lea faitalia faasui o le komiti, ae o se sui mamalu o le Palemene. O lou la saina, e le o se faasagatau i se Vaega Faaupufai, ae sa taiala lou talitonuga ina ua faatauto au faafaipule. Ia faia ma le faamaoni ou tiute, ia fesoasoani mai le Atua ia te au. O upu foi o le tusi, a e iloa le mea e tatau ona fai ae le faia, o le agasala lea i luma o le Atua.

Lau Afioga i le Fofoga Fetalai, faafetai mo lou avanoa, ia manuia le tapuaiga a Samoa o lo o faafogafoga mai. Ia manuia le tapuaiga a lo matou itumalo. Ia manuia le Fofoga Fetalai, ia maua pea lau tofa ma le faautautaga

poto aua le tauaveina o le Fonousu a le Malo o Samoa. Manuia le tatou aso, manuia le Fono.

**FOFOGA FETALAI:** Ua malo saunoa i le sui usufono mamalu. Se i ou tapa atu le sui lea, po o le a se...

**Tofa Ale Vena Ale (Faleata 4):** E faafetai mo le avanoa, ua ou tau tulai atu lau Afioga, ona o le saunoaga a le sui usufono.

**FOFOGA FETALAI:** O se mea e faasao po o se mea e faamalamalama?

**Tofa Ale Vena Ale:** O le mea e fia faamalamalama ona o le mataupu lea na saunoa i ai le sui usufono, ua uma ona tagofia e le tatou Maota, le mea lea e... ua uma ona fai i ai le faaiuga a le Maota, e le tatau ona toe tautalagia i totonu i i. Aua e te popole fua lau Afioga i lou saina ma lou le saina, e pule lava oe ia. Manuia le fono.

**FOFOGA FETALAI:** Se i toe tulai mai....

**Tofa Hon TUUU ANASII LEOTA:** O lau faafetai lea e fai i lou itumalo, ma le faaaloalo.

**FOFOGA FETALAI:** Ia malo faafetai, malo lava le tofa, malo le saunoa i lau Afioga i le sui mamalu, o se tasi o sui matua o le Palemene. E talitonu foi o lea ua faafofoga ma le totoa le paia o le Kapeneta le Faigamalo, e leai leaga ua tele foi tausaga sa e saofai foi i le Nofoa o le Kapeneta, e lava lou silafia. O le ala foi lea ua tuu sao au fautuaga ma saunoaga i le aano o mea uma, e talitonu o lea ua logomalie i le faafofoga a le Faigamalo. O le mea lea, malo faafetai, o lea lava ua e tofa tonu lava i le tau o le soifuaga ma le tulaga ua i ai le atunuu, atonu o lea ua faafofoga mai ma le totoa le tatou Faigamalo, atonu e tasi foi lea auala o le faigamalaga a le tatou Palemia, o itu uma lava ia na e taua. O lea foi e faafogafoga mai ma taualumaga o le faigamalaga, ia malo faafetai mo fautuaga. O lea ua faafofoga atu ma le totoa le tatou Malo, ia tatou faamoemoe i le Atua e fesoasoani mai, aua lava le finagalo faaalia, o le mea lea faafetai. O tofiga foi e pei ona tuuina atu, o le uiga lea o le Fofoga Fetalai ma le Palemene, o outou o le au matutua, o lo o i ai le tofa aua le manuia ma le toamalie o le atunuu, malo faafetai mo mea uma. Ua faafogafoga foi lou itumalo, o lea lava ua e sasaa faautu ia manaoga ma finagalo o le itumalo, o lea ua faafofoga le tatou malo saunoa malo le tofa.

Ona o lea sa fou mai le sa o le itumalo o Sagaga 4, ma o le toe lauga faataupou foi lea o i latou, o lea faatoa oo mai i totonu o le Palemene. Lau Afioga i le sui usufono mo Sagaga 4.

## SAUNOAGA FAA-TAUPOU

**Afioga TAGALOATELE PASI POLOA (Sagaga 4):** E faafetai mo le avanoa lau Afioga i le Fofoga Fetalai o le Maota.

Ua atoa nei le 6 masina talu ona avea au ma sui usufono, ae o se avanoa muamua lenei ua ou tulai ai i le Maota. Ae ou te le i soaina la le loto nai le itutolu o Sagaga ma le Faletolu o Leatigaga, ou te muai faatulou, tulou le faafofoga a le Maota, tulou le faafofoga a Samoa ua potopoto. Ua ou vaaia i lenei taeao le pau ma le mamalu o lenei taeao. E ui ina e le o afio le Afioga i le Tamaitai Palemia, faapea foi le Taitai o le la Itu ae ua mamalu ma paia lenei taeao. O saunoaga foi ma fetalaiga e ese lava lona matagofie. A ou matau i lenei taeao, e pei ona ou fia faailoa atu i le mamalu o le Maota, e taua ia te au le taeao lenei, aua o lea faatoa atoa pu fagota o le Maota i le taeao lenei. O lea sa faatalitali ai Luatua seia atoa Nofoa o le Paeaiga lenei ona fai lea o sana faamatalaga e i ai le taeao lenei. O lele la ua nofoia auoloolo, i le afio o le Afioga i le Sui Palemia, afifio Minisita o le Kapeneta.

Ua paepae foi faatia o taulafoga lenei taeao. Ou te muai faafeiloai atu i lau Afioga i le Fofoga Fetalai o le Maota, faapea le tatou Kapeneta. Afio le Tamaitai Palemia, Sui Palemia ma le Minisita, Sui Minisita o latou o lo o faatautaia le sa o le tatou atunuu. E faafeiloai atu foi i le la Itu o le Maota, i le afio o le Sui Taitai, faapea sui usufono mamalu ua aofia i lenei taeao. E pei lava ona ou matau i lenei taeao i fetalaiga ma saunoaga. Sa nofonofo lava lou sui usufono ma tau faitau galu i taimi ua sola o a tatou fonotaga, po o le a se taimi ou te maua ai se avanoa faapenei. O lea ua foi mai le faatautaiga i saunoaga ma fetalaiga, o saunoaga faa-taupou mo lenei taeao. Ae talu ai ua umi faatoa maua se avanoa, o le a ou le lauga faa-taupou, ae o le a ou lauga faatausala, o lea ua maea saunoaga faa-taupou o le taeao, o i latou sa tapena mai i tua atu o le aau, ae o lea o lea a tuutuu mai i le aloalo, ou te tautala ai i lenei taeao, lau Afioga i le Fofoga Fetalai.

Ou te faafeiloai atu i le tapuai faafofoga i Le Ao o le Malo ma le Masiofo. E faafeiloai foi i le Sui o le Fono o Sui Tofia ma le faletua. E faapea foi ona ou faafeiloai i le mamalu o le Faamasinoga, alii ma tamaitai o le Faamasinoga. E faapea foi le Peresetene o le Faamasinoga o Fanua ma Suafa, faapea le aiga o Faamasino. E fia faafeiloai foi i le mamalu o lenei taeao, le mamalu o le itumalo o Gagaifomauga 2 i le tapuaiga. E faapea foi ona faafeiloai i le afio o Afioga i le Loia Sili ma Ofisa Sili o Pulega o Matagaluega ua tatou faatasi i lenei taeao. Ou te faafeiloai i le tapuaiga a Tama ma latou Aiga o Aiga ma latou Tama, Tumua ma Pule Ituau ma Alataua, Aiga i le Tai ma le Vaa o Fonoti. E faapea foi le tapuaiga i le motu i Sasae. Sua ma le Vaifanua, Fofu ma Aitulagi Saole ma Saleaamua ma le Launiu Saelua, ma upu ia te oe le Manuatele.

Ae se i ou afe ane i lou itumalo o Sagaga 4, ua faafetai tapuai, le afifio o aiga, lau faautautaga Luatua, o oe o le aitu na faialaga i le Tuamasaga, ua



faamalo le tapuai, faamalo le tatalo. O lea faatoa ou maua se avanoa ou te tulai ai, e faaali outou finagalo sa outou auina mai ai au i le Palemene ina ia faatino ai ia tiute. Le paia e o aiga, Luatua, Faletolu ma le Gautaala, faamalo i lo outou titi faitama na outou filifilia ai la outou sui i le Palemene lenei. E le faigofie ia te au la outou faaaloalo. E faigata foi ia te au ona ou manatu pe faapefea ona tau ai lo outou agalelei ia te au. E pei ona malie saunoaga ma fetalaiga o lenei taeao, e le paleina i le ulu pe asoa i le ua, ae o le a faamau i lou sulugatiti la outou faaaloalo, ou te alu lava ma au i le eleele, faamalo faafetai.

O le a ou taumafai i se mea e oo i ai lou mafai ou te auauna atu ai ia te outou. E pei lava ona outou fesiligia i se taimi le malosi o la outou sui usufono. E na ona ou faailoa atu, e faaletonu lava le tino ia ae o le afi e matua malosi lava. Lo tatou itumalo, o lea e tau faalavelave le aualii ia o Olo ma.... O lea la o le a uma lau faamatalaga i lou itumalo, ae se i avatu ia Olo le mea lea e finagalo i ai lo matou itumalo.

O nai mea laiti lau Afioga i le Fofoga Fetalai, i le faasolo atu lea ia matou e tau i le malaevaalele, e i ai le tatou auala foi lea e oso atu i uta i Aleisa, lea ua alo ai nei taavale. E tau le auala o Leulumoega i le auala faalava lena, e tau i ai le auala o Nofolaii, sau i Fasitoo, o le manaia ia o le auala, e alu atu lava e tau i uta, sau i Faleasiu. Ou faapea lea aisea ua matagofie ai auala, ona toe faasolo lea o ou mafaufauga agai i tua, leaga e lelei Tolofua na fai ai auala la e i o. E lelei taimi na i ai Toleafoa Faafisi, sosolo mai i Faleasiu, o la sa lelei Tuitama lea na faia, oo mai loa i lo ma itumalo, o lea e afio mai si ou uso. O lea ua fai i i Fogaa ae faamisi Saleimoa ma le vaega lea e i o.

O le ala lea ou te tatalo atu Olo, lau afioga i le Minisita, sina auala lava se tasi o lou itumalo e faatau i uta. E faafetai mo auala e taitasi kilomita ia na fai mo le matou itumalo, ae faamolemole e manaomia se auala e tau i Aleisa, e faafaigofie ai ona feoi si ou itumalo. E le tagisa tele le itumalo lea, a outou matau ia Sagaga 4, e leai lava ni a latou aufaigaluega tauapu o aveia i fafo, e tagi lava i lima le itumalo lenei. O le ala foi lena ua outou silasila o la ua i ai Frankie i o i le itumalo lea, o la ua i ai Farmer Joe, ua latou iloa le mea la e tafe ai le suauu ma le meli, lea e ala ai ona o atu i o. O tama matutua na e le o tele i itumalo ia o outou leaga e tau le lava le seleni. Ae o tulaga ia e i ai lo matou itumalo, e pau ia o vaega ua talosaga mai ai lo matou itumalo.

Lau Afioga i le Minisita o Galuega, o la lava e matau e si itumalo au saunoaga ia na e polomisi i ai, o lea o le a faata le auala o Alamutu, lea o le a faata le auala... tau lava o mea la e i ai faifeau e faata, ae o la ua matagofie mea uma. Ua aumai foi le finagalo o si pitonuu lena lau Afioga i le Minisita, mea ia na e finagalo e aveese tulaga maota o lo o i ai, ona o le naunau lava o nai afioaga ia mo le latou faamoemoe.

Lau Afioga i le Minisita o le Soifua Maloloina, faamalo faafetai le toa, o le tele o taimi e na o tamai mea laiti lava na e i ai. O le o atu o sui nei e tui le

toto i le Aso Toonai, ae fai mai ua sioki tamai fagu foi ia e tui ai toto. O nai tamai mea laiti, ae ai ua tai taunuu mai a tatou vaa.

E faafetai tele i lau Afioga i le Minisita o Tina ma Tamaitai, o lea ua uma ona faaaoga le seleni sa avatu, ae o lea ua leva ona faatalitali mai lo tatou Malo i le galu lona lua lea o le tatou miliona. Ua faafetai o lea ua mautu mea uma, sau se taimi e te silasila ma molimauina lau afioga i le Minisita. E faafetai i le Minisita o Tupe, e tusa ma le lagolagoina o faamoemoe.

Lau Afioga i le Minisita o le Siosiomaga, e muimui lava si ou itumalo, e i ai le matou togalaau. A talosaga mai e fia tipi i lalo se laau, ae toe faapoopo se isi, e toe aumai lava e toe fai atu le pemita. E tele laau failaupapa i lo matou tuamaota o Aiga ma Luatua o lo o faaaoga. A i ai foi nisi o itumalo o saili ni laupapa, o la ua maea ona tapena, ae na pau lava lea o si faaletonu lena e i ai, ua fai si faamafamafa o aao o le Matagaluega lea, i le tau faiga o pemita e tipi ai i lalo, a o matou lava laau. E tatalo atu ai i lau Afioga o lo o feagai ma lea vaega, e faapena.

Lau Afioga i le Minsita o Faatoaga ma Faiga Faiva, sau se taimi ona oo mai lea o le faamoemoe o lenei itumalo, matou te le fai mea nuti, e omai pitonuu. E tasi lava le faamoemoe o le itumalo lenei, e tasi lava le talomua po o uluai seleselega a itumalo, e mamalu ai lena ma matagofie. O le faamoemoe lea lau Afioga i le Minisita o Faatoaga ma Faiga Faiva. O nai nutigamea ia o le matou itumalo e pei ona i ai lenei vaitau.

Ae momoli atu le agaga faafetai i le mamalu i Afioga i Minisita i tulaga o lo o i ai, sau se taimi ona oo lea o se matou faamatalaga i le Minisita o Aoga, ona o lo o tele nai isi vaega o lo o fia faalelei o le matou.....seia maea ona tatala le fale o le matou itumalo, e fai ai sina aoaoga e faatu ai ni aoga po a alo ma fanau a le matou itumalo pei o nai vaega ia.

A o le aso ma fuafuaga e pei ona i ai le faamoemoe i le Tala o le Tupe. O le ala lea o le matou taumafai atu, e matua talia e lenei itumalo e pei ona aumai le Tala o le Tupe mo lenei tausaga. E faamalo le onosai, i le Minista o Tupe, aua foi e te amanaia tele le pao mai o tua atu o le Palemene nei, tuu pea e pao tua atu ae tatou sagai e fai le tatou Faigamalo e pei ona i ai lenei vaitau.

Lau Afioga i le Fofoga Fetalai, o le vaivaiga lea o le itumalo o Sagaga 4, faamamalu foi le tulaga e pei ona i ai le faamoemoe ma polokalame fai, ma le faatulagaina o polokalame a lau afioga. Ae tau ia ina ia alofa le Atua pulepule tetele, faatamaoigaina lau Afioga aua le taitaiina o le tatou Fonotaga. Le mamalu foi o le tatou Palemene, puipui le Alii i lo tatou faamoemoe, manuia le tatou Fono.

*Na faaaliala le agaga fiafia o le Maota i le patipati o latou aao, i le maea ai o le Saunoaga Faa-Taupou a le sui usufono mo Sagaga 4.*

**FOFOGA FETALAI:** Ua faamalo faafetai saunoa i lau Afioga i le sui usufono mamalu mai Sagaga 4. E talitonu o lea ua faailoa i le Maota o lau saunoaga faataupou lea faatoa faatino, ona o nisi foi o tuatuagia sa malaga ai i atunuu mamao. O lea e faafetai ai i le Atua o lea ua faataunuuina, o lea foi ua manino le mata o le vai i manaoga foi o le itumalo, malo manaia foi le auala o le momoliga o mea o lo o manatu i ai le itumalo, faafetai. O le uiga lava lena, tatou vaai lava i auala e filemu ma faigofie ma ofi gofie, malo faafetai. O lea lava ua manino le faafofogaaga a le Malo aemaise o manaoga o si ou itumalo, o le mea lea faafetai faatoeaina, faafetai lauga faatagata matua, malo le tofa, faafetai foi mo le saunoaga.

O le taimi lenei ua maua foi le avanoa o le tatou Maota, i se tasi o sui usufono e fia saunoa. E matau atu o lea ua sauni mai le sui usufono o Palauli, lau Afioga i le sui usufono, lau fetalaiga Lagaia, lou avanoa lenei.

**Tofa LAGAAIA TIATUAU TUFUGA (Palauli 3):** E faafetai i lau Afioga i le Fofoga Fetalai mo le avanoa. Ua faaosofia le manu na i Salafai, ae ua faautufiu le manu nai Utufiu, ae ua sausaufialele le manu na i le fogatia i le taeao lenei ma le aso. Ua maea ona faatutao le tupua ma le laoi ma le maota o Samoa, aua le Atua ma lana faasoa sa olotu avefeau lana Afioga i le Fofoga Fetalai, aua le tatou taulaga momoli ma le faafetai i le Atua, e ala i lana faasoa paia. Ua mafua ai ona fesilafai i le ava fatafata ma le fofoga ava i le Palemene o Samoa. E le gata i lea, a o se faatagitagitimu ma le nonofo a le foemuli, i paia o le Talalelei. Aua faiva ma tiute o le aufaigaluga paia a le Atua i so o se Fatafaitaulaga i Samoa. Ua malo faafetai i la outou galuga fai, i la outou tatalo i le ao ma le po aua se manuia o Samoa nei ma a taeao. Ia aua ne i ausou le uto, a ia lagomalua le upu folafola aua le Atua ma lona finagalo, o outou mama na. A o atugaluga ma lomalomala o le fiafia, lele ua suasua le failai, ua savini foi faapunaomanu lagona, aua o lele ua faatali maua le atu a le tautai.

Ua i lumamea le Tala o le Tupe mo lona faitauina faalua. Samoa talofa e, malo tapuai, faafetai i lo outou faiva, la outou tatalo ma talosia le alofaiva a lou Palemene. Na o matou omai e taitai ma lufilufi lima lelei se manuia a o se saolotoga mo Samoa. O le agaga fiafia ma faafetai, e le umi tele le leo o Palauli, ae ua ou tu se i momoli le faafetai i le Tamaitai Minisita o Tupe, e le faigofie. O le fiafia o lenei itumalo o le maioio lelei, leai se nunumi o le faalogo ma le vaai, ia malo le faasoa. A tilotilo i le tamaoiga i lenei vaitau, e moni lava le saunoaga a nisi o sui usufono, ua faigata, ua mamafa, ua taugata le soifuaga. Ae peitai a tilotilo foi i le faasoa a le Malo ua fai nei, talofa, talofa i la outou faasoa le auau ma le faasoa tauutiuti, a o le tou finagalo lava lea, o se manuia ma le atinaeina o le tamaoiga o Samoa. Aemaise lava le fuaga lalovaoa, se manuia o ekalesia, o paega ma alalafaga. O lea ua sau le mea, ua amata ona tafea mai, ua tali fiafia foi itumalo. O mea ia e tilotilo i ai ma le alofa, ua ave la outou faamuamua mo le tamaoiga o

Samoa mo le lumanai. O le mea lea e lagona ai le agaga fiafia ma le agaga faafetai. O ai na manatu o le a liliu le alo o le lupe. A o le tofa paia lea o le ofoina lea o le soifua, mo le atunuu, faafetai.

Na ou sauni ou te sau, ae omai toeaia matutua o lou itumalo aumai le latou faamanuiaga ma le latou tala. Lagaia, sau e alu e tu i le laga, ae matou tuia le mulipapaga. Ia tautuana o a ni faafitauli, logotuli, o lo o tapuai nonofo le itumalo. E pau o lea, alu ma avatu le finagalo o le itumalo e matua lagolagoina le Tala o le Tupe, ave lau faafetai i le Minisita o Tupe, le Afioga i le Tamaitai Palemia ma le Kapeneta, lagolagoina e le itumalo. Ma ia tatalo ia pasia loa le Tala o le Tupe, ae se i sasaa mai faamanuiaga ma le tamaoaiga ua i o tatou lima, ioe, pau lea. O le tatalo foi lea ma le faaoololomaau i le paia o le Maota Samoa, e le gata i lenei Itu a o lena foi Itu. E leai ni pati e faia i i, a o le tatalo ma le faaoololomaau, tatou iā faatasi e pasia le Tala o le Tupe ae se i aumai mea ia i te i ua toe foi. Ae se i o tatou galulue e faatino le atinaeina o Samoa.

Agalelei mai le Atua, ua uma foi le leo o Palauli. E pau lava lea o le fia lagolago i le Tala o le Tupe ma se i momoli le faafetai aua ua o tatou vaaia le alofa o le Atua ma Lona faasoa.

Agalelei mai le Atua, ia i ai le tofa i lau afioga i le Fofoga Fetalai. Talosia le malaga a le afioga i le Tamaitai Palemia. O a ni faafitauli lafo i le auau o fisaga o matagi. Ia i ai le agalelei o le Atua ia toe faafoi mai lona soifua i totonu o Samoa. Ia faamanuia i le Kapeneta, faamanuia i lena itu o le malu, agalelei le Atua i toega o le Fono.

Manuia le tapuaiga a Samoa faapea foi lou itumalo, faafetai.

**FOFOGA FETALAI:** Ua faamalo faafetai, malo le saunoa. Malo foi mo le faautaga mau lau tofa i le matua fetalai, fetalaiga Lagaia. Ia leaga o lea lava ua e tofa ma e fetalai faa-Pule aua foi ia lo tatou atunuu ma le faafofogaaga a le Maota. Ia malo faafetai, malo foi i lou silasila aua foi le agai i luma o lo tatou atunuu.

Ia o lea foi ua ave ia lau faafetai i le Minisita o Tupe ma le Matagaluega aemaise le Faigamalo, ia o lena ua i ai ia fesoasoani ma manuia o tatou itumalo. O le mea lea malo fetalai faafetai foi lauga.

Ia maua le avanoa o le tatou Maota. Ia o lea ua matau atu ua fou mai le sa o Vaisigano 1, ia o le avanoa lea o le sui usufono mamalu, lau afioga i le Minisita Lagolago.

**Afioga NIUAVA ETI L. MALOLO (Vaisigano 1):** Faafetai i lau afioga i le Fofoga Fetalai mo le avanoa. Manatu foi o lea ua maea foi ona e toto le niu i le tuaoi. Ua lagalaga foi le pati teevao i le taeao ia aua le Atua ma Lana taitaiga ia i le Palemene o Samoa.

E momoli le agaga o le faafetai e le mafai lava ona tuua le faafetai i le Atua, le Atua o Malo, le Atua o Sapaota, le Atua o lo o Faavae ai ia le atunuu lenei

o Samoa, i Lana taitaiga, momoli mai le soifua laulelei o lau afioga i le Fofoga Fetalai. Ua o tatou le mafuta foi ma le Taitai o le atunuu vaeane o lea e afio mai ia le afioga i le Sui Palemia. Le paia foi i le Kapeneta ia aemaise foi o Sui Minisita.

Vaeane foi le afio mai o le la talaga atoa, afio mai o lau afioga i le Sui Taitai, ia pe mafai foi ona faaupu e Vaisigano o lau afioga lava o le Taitai o le Itu Agai, sui usufono mamalu o le Palemene, i lena foi Itu, le Itu e agaia ia le tatou Malo. Vaeane foi le faafofoga o le paia ma le mamalu o Samoa, mai lava i matafanua seia paia siuofanua o le fanua na tauilo ai manu o Malo. Na tini tauave i ai le sailiga a Malo, lea na to ai manuia ae tali i lagi se Ao o le Malo, lea ua Faavae ai le Malo o Samoa.

E faafeiloai foi i le Afioga i le Ao o le Malo ma le Masiofo, Sui o le Fono a Sui Tofia aemaise o le faletua. E faatalofa foi i le Faamasino Sili, le Peresetene ma le Ofisa o Faamasinoga. Ia ae a tupu ma ee, tulatoa ma tulafaasausau o tulamala o Samoa. E faatalofa foi i Ofisa Sili o Matagaluega, o outou o tua i ai le Palemene ia aua foi le faatinoina o tiute ma faiva ma valaauina ae a le au tapuai. Faatalofa foi i le afioga i le Ofisa Sili o Pulega o le Ofisa o le Fono aemaise foi o le Ofisa.

Ua ou tu atu, e manatu foi lenei itumalo o Vaisigano, a oo ina lufilufi le tamaoaiga o le atunuu, e tatau lava ona o tatou velo aso uma i ai. E le mafai foi la ona nofonofa lenei usugafono. E fia fai foi sona sao ia aua ia le lufilufilimalelei. O lea ua taoto i lumamea le Palemene, ua silasaaga ma silamio Samoa e tauala atu i ona sui usufono na faia mai i le fuifui lea ua atoa ai pou o le Palemene o Samoa.

E muamua ona fia faaleo se agaga o le faafetai i lau afioga i le Tamaitai Minisita ia aemaise foi o le Ofisa Sili o Pulega, le Sui Ofisa Sili aemaise o le Matagaluega ma lou auvaa. Faafetai mo le tapenaga matagofie e pei foi ona sausaunoa sui usufono foi ua maea, ia o se tapenaga maea tapena lelei. E i ai le manatu o se avanoa ma se laolao lelei foi e faafeiloai atu foi i le afioga i le Ofisa Sili o Pulega o lau Matagaluega, ia ua tulai mai i lenei foi taimi o le tatou galuega. Ia afio maia tala mai aao, malo le toa, malo le lototele. Ae manatu lava e meemee foi le lagona o Niuava ia, a ua manatu ia e leai o le fanau talosia foi a lenei itumalo ia ma lenei foi aiga. Ia ona ua malosi tele ia lou loto, ia ona o le sao o lau filifiliga ia i le itu malosi, ia ua faapea ona lagolago i lau galuega. Malo le toa, sagai ane ai o le tai, talitonu i le Atua, e na o le Atua e na te taiala i faiva ma galuega o lo o faapea ona tapena mai.

Lau afioga i le Fofoga Fetalai, e i ai nai vaega e fia oo i ai se manatu o lenei itumalo. E manatu e le toe tele ni manatu o lenei itumalo e tagisa ai i le Malo, ae mafua i se a? O lea ua taoto le miliona. O a poloketi a itumalo, o lea ua taoto i i. O lea foi ua saunoa le afioga i le Minisita e a ia le poloketi, o auala e tau i faatoaga, ia o auala ia e mafai ona faatino i lalo o le tatou miliona lea.

O lona uiga la e le toe manaomia, ua fai lava e au ia au auala e alu i au aualagalue. Ia ua pule foi au, i le kamupani e omai e fai ia au aualagalue. Ae ia fai faasoasoata tatau lelei, ma ia alu pea i le taotoga e pei ona i ai procedures o le faatinoga. Aumai tauofoga e pei ona aumai ia ae faatino ai ia le galuega, transparency, accountability, ia e i ai ma le isi upu na e tasi ina ia manino le atunuu, ia o tupe a le atunuu o lo o faatino ai ia nei vaega.

E le oo se tala a lenei itumalo, manatu foi i le tau o le soifuaga ua i ai. Ia aemaise foi o le tau o le penisini ia vaai atu lava ma le alofa, i le tau tapena pea e lau afioga i le Minisita o se auala e tau tuutuu mai ai i lalo. Ia paga lea tatou tatalo pea i le Atua, maua le lototele ina ia mafai ona maua le filemu i atunuu o lo vatau pea, ina ia mafai ai ona tuutuu mai i lalo le tau o le tau o le tatou penisini.

Ae e i ai le vaega e fia oo i ai le tatalo a lenei itumalo, a silasila i tane tetele o lo o teu ai le suauu ma le penisini i luga o le uafu, e tau ave i ai le manatu o Vaisigano e le mafai ona aveese. E i ai lou lagona e taugata ia le vaega e relocate ai ia tane. A silasila i tane nei, i le taimi lea na tupu ai le faalavelave. Lau afioga i le Fofoga Fetalai, e taamilo mai lava paipa o tane ia e sau i totonu i luga o le vaitafe lea i Vaisigano, taamilo mai i luga o taligalu seia agai mai i le mea o lo o teu i ai tane penisini.

O le manumanuga i lou sui usufono, ai ona o le alofa o le Atua. O lea na ala ai ona le tupu se... a oo ina papa ma sosolo le mea lea, e afaina uma nuu tu taulaga. Ia ae le mafai foi ona nofonofo le tatou taulaga nei, Ofisa o le Malo ma tulaga faapena, pe a oo ina papa tane ia ma agai mai ia le mu. O le tatalo a lenei itumalo i lau afioga o lo o feagai tonu ma tulaga ia, manaia ae toe mafaufau i se ogaelele e saogalemu lelei, mo le saogalemu o le atunuu ma totonu o le taulaga ma Ofisa o le Malo, ia aemaise foi o nuu o lo o tulata mai, e i ai lou talitonuga, e lelei ae vaai se fanua e relocate lelei i ai ia tatou tane ia mai i totonu o le taulaga.

Lau afioga i le Minisita o Tagata Tafafao mai, faafetai tele, malo le lototele, ae o lea ou te vaavaai atu i luga o le tatou TV, ia o lea foi ua toe sau ia le tatou ata fou lea o le Survivor lea ua pue iinei i Samoa. Malo lava le lototele, faafetai le galulue. O le tasi lea o vaega taua o lo o faapena ona sell out atu ai ia le matagofie, the beauty of Samoa i atunuu i fafo, o le ata lea o le Survivor. E ese le taua, e tele foi tupe a tagata faipisinisi e maua ai i totonu o le atunuu.

Ia e i ai foi ia lenei vaitau o tatou i ai i faamai ma tulaga uma faapea. Ae e i ai lou lagona mo le tapenaga o se isi Survivor i luma mo le isi tausaga i luma, manatu e manaia ae avatu i Savaii. Silasila oe i le mau a Vaisigano, o le taunuu mai o le faigamalo fou, we survive because of the red colour. It's from the island, the big island of Savaii. E a? manaia foi le isi Survivor mo le lumanai, avatu e pue ai Salafai le motu tele, so that we can sell Savaii as well i le lalolagi.

O nai aitia foi ia e faatumu ai le atotonapona a lau afioga ia aua foi le lumanai. Ia ma se i faaaoga ai foi ia taavale rent. Ia e manaia ae avatu i Vaisigano, maua le uafu, maua le malaevaalele, maua uma lava mea uma e te finagalo e pue ai lau Survivor. A e manao foi i ni accommodations, e mafai ona avatu e Vaisigano ia le vaa meli tele e nonofo ai pe a fai i luga o lana miliona.

Faafetai i lau afioga i le Minisita, e ese le taua foi o lea vaega i le tulaga o lo o taoto ai ia au fuafuaga, aua o lea o le a tatala nei ia tatou turisi, ia ua matagofie ua o faatasi ma fuafuaga a le Matagaluega.

Ia ona oo lea o si nei foi manatunatuga i lau afioga i le Minisita o Aoga. Faafetai tele mo le tapenaga o tatou poloketi, ia o lea ua maea ona toe tasisi i luga se i tulou ia tatou WIFI i luga o tatou aoga, ia manaia e galulue e lelei lava le toatolu o kamupani maua le seleni a le kamupani ia. A o le mea sili ma le taua, ia alu i le atoa le tatou internet aua tamaiti.

Ae e i ai le lagona o lenei itumalo lau Afioga i le Minisita o Aoga, aemaise foi le Sui Minisita ma le faafofoga foi a le Ofisa Sili o Pulega, silasila i le itumalo lenei o Vaisigano 1 e tau i le Alataua, e tasi le kolisi. Ae a oo ina uma kolisi a tamaiti nei ona tau malaga mai lea i Apia. E na ona tatalo atu i lau Afioga, e manaia ae fai se tatou TVET tasi lava e alu atu i Asau e tau i Falelima. O le tele o tamaiti o le tatou itumalo mai suesuega, e laiti lava le pasene o nai tamaiti e ausia le university UPY. A o le toatele o tamaiti, e pei e agaga lava latou i galuega ia taulima ma mea faapena, matata e aoga i tua i o tatou nuu, a o le mamao ia o le omai i Salelologa i le mea o lo o taoto i ai isi aoga, e faapena. Ae a faatu pea le kolisi i le Itu Asau ae tu le tatou TVET i le Alataua i mea o lo o i ai lau Afioga, fegasoloai ai tamaiti, faigofie ma mafuta ma matua ina ia faaitiitia ai le o ese ma mafutaga ma matua, o se itu lelei tele lea lau Afioga i le Minisita. Ia, na ona tuu atu i ou autafa lau Afioga.

E momoli foi le agaga faafetai i lau Afioga i le Minisita, o lea e matau atu o lea lava e fai pea le tatou grant foi lea mo aoga e aafia ai ma aoga faataitai. Faafetai. O lea foi la e matauina i totonu o le tatou tupe lea, ia o lo o mafai ona i ai se tupe o le vaegatupe lea e totogi ai faiaoga o aoga faataitai. Manaia, faafetai tele mo le tapenaga o lea vaega.

Ia, lau Afioga i le Minisita o Faatoaga ma Faiga Faiva, e momoli le agaga faafetai i lau Afioga mo galuega, ua vaavaai foi lenei itumalo, pei ua tau augata foi ma tau fefefefe le itumalo e aumai se aso e faatino ai lana Talomua ona o le tapenaga matagofie o lo o faapea ona faagasolo. Malo le lototele. E i ai le lagona e taunuu le asiasiga a lenei foi Komiti i gauta i le fale foi lea o le SROS po o le Scientific Research, ese le matagofie o lagona o le Komiti ina ua taunuu, tele masini ua faapea ona faataunuu ai, ua oo i ai suesuega i mea o laulaau o lo o maua i totonu o le atunuu. E ese le matagofie. E oo lava i le koko o lo o fai ma tele ai tupe a le atunuu, o lea ua oo i ai suesuega mo laulaau, o laukuava, o laumoli, ia, e ese le matagofie. O lea e i ai le tatalo a lenei itumalo, aua o lea o le a amata lava ona fau lava mea nei, locally

produce i totonu o le atunuu, from our local leaves, local roots, from our local plants. Na ona ou... ou te vaai atu i le Tala o le Tupe o lo o i ai le tupe o lo o ave i le Faalapotopotoga, ae manatu e le taitai lava le tupe lea. A fua foi i ai i galuega ma suesuega o lo o fai, e fai lava e alo ma fanau o si o tatou atunuu. E ese le faafiafiaina o loto o le Komiti i le agai atu i le SROS i le maoae o le silafia ua oo i ai le tulaga o lo o i ai alo ma fanau, o lo o i ai i totonu le Associate Professor i totonu o le Faalapotopotoga. E tasi lea vaega e tataua ona silasila i ai, o le tatala o le avanoa i alo foi ma fanau a le atunuu o i ai o latou background i suesuega nei faasaienisi e toe agai atu ai i atunuu i fafo e toe sue mai nisi o latou faailoga. O le mea lea e momoli atu ai ma faaleo ai e lenei itumalo le agaga faafetai i lau Afioga. Faafetai foi i le Ofisa Sili o Pulega o lo o feagai ma le tatou SROS, aemaise foi o alii ma tamaitai fomai, o Doctors, Asosi a Polofesa, Professors o lo o i totonu o lea Matagaluega. E ese le faafetai o le loto.

Ia, o le tatalo pea a lenei itumalo, ia faamanuia pea i lau Afioga i le Minisita, faamanuia foi i le afioga i le Ofisa Sili o Pulega o le tatou Faalapotopotoga o Suesuega Faasaienisi, ia maua pea lou lototele, e ui lava ina laitiiti lou tino, ae o lo o tele lou fatu e faatino ai le galuega aua le manuia o Samoa. Vaai tatou fualaaui lea e fai i le laulaau aua le manuia e faaitiitia ai le lapopoa ma le tino puta, ia amata ona tufa mai i le Palemene, faataitai tau faalusilusi ai isi o tupu ma ee ina ia aoga le fualaaui. Faafetai tele mo le galuega.

E le na ma le laina lau afioga i le Minisita, tulaga e pei ona laga e le afioga foi e se tasi foi o saunoaga i lenei taeao e taugata tele ia le tau o le tatou sima. Ia ae o ni mafauauga e faatupu tele ai ia lau ato, lau afioga i le Minisita o Galuega. Ia e ui lava o lo o ta galulue ae lelei foi le faalogo mai o lo matou itumalo o lea foi e avatu se fesoasoani o nai mafauauga mai i le itumalo.

E finagalo le itumalo i le tulaga foi lea sa i ai le ili laupapa i Asau, e manaia ae fai ai ia se tatou falesima, locally produced. Maua uma mea uma, e na o le tasi lava le vaega e supply mai overseas ia ae fai uma iinei le isi vaega. E manaia ia ae tau sell out ia le idea i tatou kamupani, ina ia mafai ona locally produced ai ia le sima. E le gata e taugofie ai i totonu o le atunuu, ia but e lelei foi mo se export i totonu o le tatou atunuu.

Ia lau afioga i le Fofoga Fetalai ia ona faamulimuli lea o sau faamatalaga. Lau afioga i le Fofoga Fetalai e le mafai lava, e mamafa lava i le loto o lenei usugafono le silasila i luga o upegatafailagi lau afioga, e mea le loto. E faamaualalo foi le agaga i le tulaga o lo o faasoa ai le paia ma le mamalu o le atunuu i luga o upegatafailagi.

Talofa e i le Gagana sa meeme ai le atunuu. Talofa e i le vafealoaloai, sa fusifusi ai ma tuumumusu ai le atunuu. O le a nei? Leai se mea, ae o fea e mafua ai? Fai mai le upu a le atunuu, e afua mai i mauga manuia o nuu. E afua mai i mauga manuia o nuu. Ae o le matau a lenei usugafono tulou, ou te le fefe e faamatala ma tau le mea lenei. Afai e solomua ma outou silasila



i luga o upegatafailagi i upu ma saunoaga a le paia ma le mamalu o le atunuu e oo lava ia tatou fanau, o fea e tua i ai? E tua mai iinei i le Palemene.

Talofa e i tamaliiga, lau afioga i le Tamaitai Palemia, lau afioga i le Taitai o le Itu Agai ia ma sui usufono mamalu uma. Talofa e i tamaliiga pe a oo ina feita tagata o le atunuu i upu e talafo. Talofa e, o fea o i ai le mamalu o Samoa? O fea o i ai le vafealoai? Ae o le a le mea lea e tupu? E solomua atu i le Palemene lenei, ona fetauai. O le upu a le atunuu e afua atu i mauga.

A tatou le fifilemu tatou o Taitai o Samoa, e le mafai ona filemu tagata o le atunuu lenei o Samoa. Fai mai e susunu ola tulou, tulou le gutu ou te ofo. O le Gagana, o le gagana e fai ma piitaga ma sootaga, sa mamate ai o tatou tuua, fea o i ai? Leai se mea. E mafua mai i se a? e mafua mai i le Palemene lenei o Samoa. O se faaoololomaau, ae o se tuualalo foi e le ona o Niuava, a o le tofa lea a le itumalo, Taitai o Samoa, tatou fifilemu, se i toe aumai le mamalu o le atunuu ua amata ona mou atu. Leaga e manumanu i o outou tamaliiga.

E leai se isi o Samoa e le o se nuu, o le aiga e tasi, e tasi lona tupuaga. A o le mea sili e faaletonu ma leaga, e aafia, o lo o tatou pasia pea le information i a tatou fanau ma fanau a a tatou fanau. Why can't we stop it now?

Lau afioga i le Fofoga Fetalai, ia o se augani lea a lenei itumalo e faauma atu ai lana lagolagoina o le Tala o le Tupe matagofie e pei ona tapena i ai. Malo le galulue. E faamalulu atu i lau afioga i le Fofoga Fetalai aemaise foi o sui usufono mamalu o le Palemene ma Samoa. O le a foi sa outou faafogafoga mai ua le tautamalii se upu foi ua laavale, tatou tuu i luma o le Atua ia le faigamalaga.

Talosisa ma tatalo le faigamalaga a le Tamaitai Palemia ia aemaise foi o nisi o Minisita. Ia tatou talosisa foi ia le gasegase o lo o i totonu o le tatou Palemene, ia nisi foi o sui usufono mamalu o faataotolia i apulusia o tofaga, ia se taimi toe faafoisia le malosia tatou feiloai.

Ia manuia lau afioga i le Sui Palemia ma le Kapeneta, manuia foi ia le afioga i le Sui Taitai o le Itu Agai ia ma sui usufono mamalu, ia manuia lau afioga i le Fofoga Fetalai, manuia Samoa, faafetai.

**FOFOGA FETALAI:** Ia ua faamalo saunoa i lau afioga i le sui usufono mamalu mai Vaisigano 1, atonu o lea foi ua faafogafoga ma le totoa le paia o le Maota, aemaise foi o le faafogafoga mai o le atunuu. Ia o lea lava ua sasaa faaoti ia lou finagalo faaalua ia ona o le manatu lava i le atunuu ia ma ona tulaga mamalu e pei ona i ai.

O le mea lea ia malo foi le faasoa, atonu e taua foi le faafogafoga mai o latou o lo o faatinoina ia mea, ina ia faapena ona toe tapui ma toe aumai le mamalu o le Palemene i le mea sa masani mai ai ia outou tuua ma o tatou matua i tausaga ua mavae. O le mea lea faafetai faasoa, ia o lea foi ua aumai lou finagalo aua foi le faaleleia o lou itumalo, faafetai le silasila mamao.

Ia talitonu foi lea ua o tatou lata i le tatou taimi malolo, ou te iloa foi ua le toe lava se taimi o se tasi o sui usufono. Ia ua i ai le manatu o lea ua tatou latalata i le tatou taimi malolo, ia taeao aena foi ia toe faaauau ia le tatou fonotaga.

Ia ae e i ai le manatu e momoli atu le faamalo ma le faafetai i le lavapapale foi o le tatou Maota, Faafetai foi mo saunoaga o lenei aso. Malo tapena, ua matagofie finagalo faaalia, o lenei aso muamua o saunoaga o le tatou Tala Faatatau Faaopoopo ma le Tala Faatatau Autu o Tupe 2022/2023, ia o lea ua 7 ia tatou saunoaga o lenei aso. O le mea lea faafetai le lagolago mai i le Nofoa, matau lava ma le totoa ia le tatou galuega, ia o lea lava e tatou te galulue faatasi. Ia malo faafetai le lagolago i le tatou galuega, aua lava le faagasologa o le tatou galuega. E fai si umi o le tatou galuega mo lenei vaiaso.

E manatu foi o le a fai se tatou malologa, tatou talosia ia le alofa o le Atua i le aso a taeao, e toe faaauau ai ia le tatou galuega. Faafetai Samoa i lau tapuaiga, ua iu manuia lenei aso i le Fonotaga a lau Palemene ona o lau tapuaiga. Alofagia e le Atua galuega o totoe o lenei aso.

Ae e tatou te le i tolopo, ou te talosaga atu ma le faaaloalo i le sui usufono, le sui usufono tamaitai lau Afioga Aliimalemanu mai Alataua Sisifo e te faaiuina maia le tatou Fonotaga i se tatalo.

*Na tolopo Taualumaga a le Fono Aoao Faitulafono i le itula e 1:00 i le afiafi seia aulia le Aso Lulu, 22 o Iuni 2022 i le itula e 9:30 i le taeao.*